

麗澤縣志卷十九

麗澤志八

碑誌上

教諭方棟去思碑

嘉靖

知縣張師伊大名

予始至項即詢諸父老學究誦說往往任官師有德惠於士民者取為我鑑於縣得戚侯學得方先生予再懇之曰凡官於爾土為令為師者無慮數十易惟戚侯方先生足我鑑耶父老學究曰唯唯越三日乃徧告羣神知戚侯民立有生祠歸然在北門外予既展謁而並嘉項人之志可以德感也獨方先生漫無徵載私意當會
有言者今年己丑夏五月有石子之忠王子陽泉輩為先生治去思碑來屬予文予曰方先生何德爾二三子乎乃各為予言之感感然不覺淚下且曰大人為二三子頌方先生者幸勒之石庸誰

知千秋萬歲後不為峴山碑耶夫人情有好惡則有捨藏有厭思則有託寓苟卿所謂必假物以為用者而君子映華於奕世匪人煽穢於不已非人心有偏亦公論之定也質諸二三子則方先生豈不榮聞休暢芳猷妙烈如鳳凰翔於千仞蘭蕙發於幽谷而不能自秘其馨彩有見聞者當以親就為快况子弟於師耶今思其作人則豈弟不可磨思其恭己則莊敬不可惰思其恤貧則慈惠不可忘思其篤行則鄙薄不可長讀學約之條則思士習之端觀聖終之揭則思正脈之緒悚祀典之嚴則思禮教之重諸形之述作規制可繹思者夙夜以佩之終身方先生雖遠未嘗不在二三子方寸中矣苟不此之務而徒表石以炫思則所樹之石徒為方先生虛飾耳且爾二三子又何德於方先生耶雖然吾願二三子大充其所思而致身青雲以沛方先生之教使天下國家皆蒙其

餘裕草木昆蟲亦借其潤澤二三子可謂善用其思則予石上之言不益與有光耶方先生名棟字直夫號一菴巢人也由貢士分教黃巖陟項城學諭今為樊山王傅云

知縣魏勳去思碑記

慶隆

鄧 糾邑人

長人者在位平其政百姓得其所而相安無擾未足為異迨其去也遮道易履焚香尸祝號泣隨之此猶愛之暫也侯今去項幾三載矣事久論定良心不泯感而思焉思而碑焉何也君子觀之可以知政可以知愛可以知風三者備碑非徒為者嘗徵諸民曰公之未去也吾飽息焉吾酣歌焉吾優游焉吾寢帖焉公何有於我也公之既去也事感而衷激衷激而思興乃知公固安養我也微公吾甯息耶歌耶甯優游寢帖耶噫離我父母惠不我及皇皇然欲寄思於永久弗能也吾項卿大夫士暨諸耆老僉曰吾民同情

民之思猶吾之思也思而不紀公之善懼其久而泯焉是不可不
碑哉遂相謀礪石徵文以紀政績侯也廉正立其本明恕達其用
經世文章飭其矩以新學校以表節義以省財費以抑豪右以植
良善以均賦役以簡詞訟以息盜賊網舉條列皆足以係民思而
不忘凡此類者筆其畧也未足以盡侯且三年德政種種不一其
詳載於新志可稽魏侯去思碑擬外史云思生於心者也其孰感
之蓋原諸政碑成於思者也其孰主之蓋本諸愛後之司牧者規
之曰美哉魏侯之為政也吾獨不得魏侯哉其孰使之蓋得諸風
三者備碑非徒為者卿大夫士暨諸耆老曰善請登諸堅珉以示
不磨侯名勳字世卿山東臨朐進士

知縣賈明遠疏通河道碑記

慶隆

員外雷大狀

上蔡東北百二十里許為項城縣即古項子國也縣故隸汝南郡

明興沿隋之制改隸今陳州且二百年風壤深厚號稱壯邑顧其地卑下沮洳衆水奔匯直東黃河經行潰徙靡常西北支流來自朱仙鎮者復折而東與沙澗諸水會合是為三岔口實要害津也隆慶壬申秋大水霖潦彌野邑有鉅姓劉詔者率衆壅水罟魚壞民田廬舍境土之不沒者僅十之七而瀕河陳蔡諸村亦波及加慘焉萬口洶洶且往愬之然懼弗克理也無何會項城令賈侯至衆相謂曰吾得直於公矣乃羣擁告病具所以壅水狀求侯理侯曰有是哉以告者過矣遂單車往按狀悉如百姓言侯始驚歎良久旋迹其人命亟撤壅水者明日逮至庭下得訊如律已又白各上官俾著為令以昭鑒來者猗與侯之心所以視陳蔡民無異於若民矣既浹旬居民葺廬耕者戒耜德侯之生我嬉嬉焉忘所報也謂不可莫之紀於是陳州人鄭繼珠上蔡人謝玉澤鄭孟陽等

來問記以識明德雷子曰曲防之禁霸盟所恥鄰國為壘白圭見
惡祇病其心私也先王畫土分民務各求理甯以胡越視我爾哉
今侯用心若此得大公之道矣所謂以天下為度非耶夫公者宅
心之要而宰事之樞也是故拯溺捍患可以觀仁除慙戢梗可以
觀義觸機迅發可以觀勇鏡奸燭枉可以觀智一事而衆善備侯
之才度可以易及哉昔士子贛欲以身捍金隄之決而天子致增
秩之寵翟方進奏罷鴻隙陂而鄰土興懷歌謠侯於今日殆兩見
矣於戲以項城令而能大庇陳蔡之民以陳蔡之民而顧戴項侯
之德民風政蹟不考可知也後之令斯土者尚知所繹思云

知縣題名碑記

萬曆

教諭蔡道充

江陵

項城縣題名碑成道充氏諗觀焉曰碑以名命修其質也名以碑
永合其鑑也故緣質者該情聲矯鑑者昭榮辱夫情聲榮辱謂之

名審情暢聲滋榮哀辱謂之立名夫名之立固必有道矣六務五德二躔始終之道也名錄立焉故勞逸寬嚴敏惠六務也智公忠斷神五德也君信民思二躔也夫情各趣操蜚聲桴遂樂者天行辱者淖憊試於碑題乎考見矣是故烹鮮啟恫而堂琴禮桃以逸名叢神投柄而戴星舍棠以勞名東野馬漬而寢閣賣佩以寬名水狎浚傷而拔雉入閒以嚴名刻舟恣昏而聞哭左箸以敏名乳虎鮮遺而烏哺鹿隨以惠名夫時有難易施有阻達則勞逸匪漫試之理也寬嚴匪畫一之政也敏惠匪要譽之藉也故參伍以出度存乎智持平以伐畸存乎公批繩以導卻存乎斷定哀以和衆存乎忠時勞時逸時寬時嚴時敏時惠如甘辛宮羽之合變化權宜存乎神若是者德全也全德者六務之妙施名聞之厚植也稽德於務考名於碑孰如智公忠斷神而全乎而偏乎情實大致於

斯睹焉必無遁也夫五德固出乎情哉然而侈於聲矣故古循吏以高行流聲也進秩特駕重書勞藉君託信焉桐鄉蒸嘗而陽報祀民膏思焉夫信者靡左右之習而思者靡日計之漸也縈閭長世避孰大焉不則將職佚而名湮德辱之謂何嗚乎齒薇而勤義拾葵而助廉名勵之也蓋士未有不名而勵者也故六務五德二躔往之雅質來之嚴鑑也君子盡心焉於以翔情聲於以別縈辱則勵之至而名之彰也故曰始終之道也然匪題則不能永是故碑以命成焉蔡道充曰事有由需名有由成河南同官題則以裴均藍田壁記則以崔斯立二公當時名賢也故項城題碑非王先生其孰與議成事哉不然項二百年建矣豈其需諸豈其需諸按碑題自洪武以來總若干人姓籍列之下方

儒學教諭題名記

萬曆

知縣王欽誥

太和

國家闢學宮育才士尤慮士迷於學轍莫為指南也為置學師諭且訓之茲豈徒校厥文藝俾搦管攜華瑣瑣修槩人業以博青紫云爾哉將令定爾志正爾誼明爾道敦爾節遂爾蓄養備爾幹濟周孔其情思伊傅其功業古所謂求志為達道之地乃稽古之正鵠而實藉師以諭之訓之也以故除斯秩者必以科以貢絕途不得躡躋若曰陶美自型株嘉由莠師者士之型莠也固宜秩選之慎哉晚近世師溺其職程課試藝而外一無所迪啟而士也相習於澆漓其意氣視師若贅疣有司者亦謂茲秩無所賴長不聞有帥士尊師士所以日倨日狎師不嚴道不尊也嗟乎民生於三師居其一匪師則莫與教孝教忠而親無令子國乏良臣綱常頹風俗壞矣師蓋可易忽乎哉余昔操鐸魯棠棠士積窳積僞不隨余所左右余嚴毅繩之始未嘗不苦束溼而後稍心帖也萬曆甲午

冬余來知項事而項士之竊憾若甚於常者幸蔡楊邠諸君正己
率先著為訓語刊布而約束之未幾而青衿諸輩循循雅飭昔之
攘攘熙熙者胥變為敦讓尚義余於是信項士易興而士風轉移
所藉於師教非淺也故為次洪武以來諸師姓氏里籍題諸石將
俾觀者指示曰某也良諭訓毅某也匪良諭訓不毅庶幾乎後來
師此土者目接心驚端楷肅摹以為項士先而項士亦且勃勃有
興乎以上舊志

袁端敏公臨淮祠堂記

喬鶴年

自古循良之吏功在一官一邑既歿而民不能忘或尸祝而社祀
之至於功臣猛將秉旄授鉞率貔虎之士爭疆場之命其勳業炳
於當時而民或不懷其惠論者謂臨民與治軍其道不同然如顯
城袁公視師臨淮既薨而邦人思之弗衰願於官請建祠奉祀又

何獨異耶以謂馭士嚴而有恩愛民無擾故軍與民咸德公猶淺之乎言公也當粵賊入皖勢橫甚皖北郡縣迸散破壞公以孤軍跼蹐皖豫之交張機設奇落其爪牙厥後秉節督師粵賊陳玉成逞於南亳賊張樂行踞於北奸民苗沛霖挾詐觀變降將跋扈恣肆旦夕發難肘腋之間萬象岌岌伺公一身公一搖足則淮以北非復國家有公乃不震不動徐出方畧復列城殲賊魁悍將帖服盡力苗沛霖雖有異志終公之任亦不敢發臨淮晏然淮徐兗豫之交雖賊民屢鬪勢不能南合羣寇旋起旋滅不為大患夫用兵之世天下安危常爭尺寸形勢要害之地愚者有其地而不能據棄一城而搖動四海深識之士得而守之震撼而不搖陷危而不去遂足以制敵死命康濟大勳扼臨淮以控南北其利害之所關甚鉅其精神智力之所措注甚遠雖天下後世猶將賴之而况

於兩淮之民親受其利其又焉能一日忘公也哉余與公同歲通籍公官先達為御史直聲震中外迨以漕督持帥節余方為轉運使每得公書慷慨忠壯之氣涌溢言表至於審幾慮事則深沈周慎計出萬全竊以歎曩以直諫服公知公猶未深也苗沛霖者鳳臺諸生以健猾驅使鄉里其衆數萬公初亦欲招之為用繼察其必叛嚴為之備密請討之當咸豐十年京師有兵警侍郎勝保奏徵苗沛霖帥師勤王後又奏調挾往陝西討賊公皆力阻其說事得寢脫如所請資以兵柄使得窺我虛實攘據形便卯育涵濡其勢益大其禍何可量哉公在臨淮先後五年同治元年冬以病告歸陳州二年春沛霖乃叛公方奉命治團練於其鄉猶陰勸皖民俾勿從賊及公薨而沛霖旋伏誅人且以為公之神靈有以相之也是年冬余奉撫皖之命三年仲春至臨淮領公舊部

每與僚佐將士及淮人言及公靡不嗟歎思慕者先是有詔祠公於陳州於是羣吏諸將及鄉士大夫迺請祠公於臨淮余上其事於朝復有旨許可民走趨役如營其私祠成薦享羣工熙熙乃復為記以饒諸石俾後之論世者知公功業之所在而因以究夫得失成敗之形勢焉

重修邑北大路碑記

訓導范 治寶豐

平治道路王政之一端也古之時司空視途設有專官凡以治其坎窞歸於蕩平法至良意至美也項城南通荆楚北達省垣鎮連周口地接陳淮為車徒之所往來商賈之所輻輳而邑之北號衝要焉先是周道如砥固常以時修治矣歷年久遠無平不陂每當夏秋之交陰雨連綿河溝漲發大關之北半成澤國婁隄以南盡屬波臣乘輿有濡軌之歎行人有褰裳之憂衝淤數載君子傷之

於是劉君雁題張君靜齋等高諸同人各捐資財共成義舉經始於丁卯之桃月雇夫役侍畚揭取路旁溝中之土以墊之使斷者連陷者平寬仍其舊而高增三尺自項而北計程凡十六里閱月而功竣焉夫路高則水無所容溝深則水有所歸雖遭淫雨永無泥潦遂使十數里之內向之目為險道者今則悉成康衢矣非雁題諸君之力曷克臻此昔鄭子產以乘輿濟人孟子譏之以其所濟者少而不獲所濟者多也今茲路之修農夫相與慶於野行旅相與歌於塗即推車擔簣之夫亦皆樂其平易相與咨嗟而稱道之其所濟豈止一人一方哉余嘉諸君之好義樂施以普利濟因為之序且以勸後之繼起者

東嶽廟碑記

余晉昇邑人

泰岱為五嶽之冠典自秩宗紀於籀史由來尚矣然望秩山川徧

祀羣神非有社稷人民之寄者例不得與故泰山之旅孔子非之
後世聖道不明詔瀆怪誕之說日作封王封帝歷代有加我 國
家申明祀典大洗前訛凡嶽鎮海瀆祇以山川名號稱其神而祠
之在民間者亦聽民祈報焉誠以鍾靈毓秀足以興雲雨而福蒼
生則取其神而人事之固宜為王政所不禁也近村東嶽廟始建
無可考據石刻前明天啟間王公斯從施地若干畝倡衆重修予
先高祖邑庠公復施地若干畝為香火資歷年既遠半就摧圯予
先兄廩膳公繼志修理距今又四十年矣殿宇頽敗丹碧塵封所
餘者黛色參天槐陰滿地而已歲辛未鄉先生王公符節暨同事
諸君瞻禮徘徊心用惻然相與釀金而增新之復斬餘資修築廟
南路三里橋五座工既竣而屬予記其事於麗牲之石且曰是地
也於子為近疇昔之役子之祖若兄實有力焉則子何容以不文

辭抑予竊有進者古之人黨庠術序有學有師後世學校之政不能徧及於鄉而菴觀寺院每增設義塾萃一方之子弟賢而秀者相與揖讓於其中則夫新其廟貌謹其局輪欽東嶽之靈上以調風雨而裕國課下以厚風俗而培人才以視夫除道成梁其有關於王政者事相均而義實相等不然游惰之徒賭博於斯燕會於斯又不然而妄欲祈福免禍焉則不如林放吾夫子早已歎之度非昔先民施地重修之意也予既以從諸君後無能辭因次其年月日並述所聞以為之記

按此記係晉昇之姪連等代作

候選知縣甲午舉人張公德教碑

高釗中邑人

光緒二十三年夏五月 誥封中憲大夫恩周張公以疾終於

里第踰月門下士吾族姪孫山介張君亮臣趙君自勤楊君亭雲等詣予而言曰自吾師云亡吾儕俵俵無依如失慈父母也吾師

教澤浹人肌膚吾儕欲闡揚德意而莫罄形容也吾子與吾師為
戚黨年既相若相知又最深敢乞一言勒諸麗牲之石余不獲辭
綴述行畧而繫以夙昔交遊之感焉山之言曰吾師淹貫六籍不
為章句之學於書精洪範謂與謨貢相表裏詩維王迹與春秋例
異而旨則同三禮宗鄭康成而秦文恭之五禮通考其典章大備
者也畢生精力尤在於易反覆於陰陽消長之機而於納甲納音
爻辰卦氣諸說皆能得其自然之象數讀史論古今得失如明鑒
照人妍媸無毫髮爽旁及天文輿地山經海誌靡不綜覽以博其
趣講學不持門戶之見謂金谿姚江其言論行事多與洛閩符合
未可因末流之弊而詆先儒故發為文章汪洋浩瀚有根柢其素
所蘊蓄者然也亮臣之言曰吾師家素豐而勤儉耐勞苦自奉澹
泊如族鄰待舉火者數十家座客常滿吾師日手一編教子尤嚴

而有法哲嗣馨菴農部應萃科領鄉薦捷南宮馳譽薇省一東趨
庭之訓平居以誘掖後進為己任邨東數百武高邱寺者吾項勝
蹟也吾師偕余君棟堂夏君默齋枋設毋欺義塾延師課讀與同
志結社昕夕往來經紀於其間負笈從遊之士凡寒暖而英資可
造者仗其膏火而裁成之或遊庠或食廩叨飲食教誨之恩方冀
常隨几杖而哲人萎矣憶咸豐年間釗中與封翁俱弱冠值中原
寇亂燧逼郊坳偕棟堂默齋隨鄉先輩共籌守禦封翁每畫一策
灑灑數千言議論俊偉有豪俠之風同治初年釗中棄官歸養時
方議修邑乘偶過訪封翁出所作三鷗路辨謂舊志誤以襄城為
項城其考核詳確鉛槧耆宿不能過也光緒改元釗中薄宦再至
京師棟堂旋以甲科觀政比部默齋亦由大挑得縣令而封翁獨
齋於遇及釗中使滇聞馨菴掇巍科分部屬封翁亦以耆年蜚聲

雁塔竊喜遇嗇於前而報豐於後可為績學者勸也乙未夏釗中
乞休棣堂默齋已相繼歸道山感知交之零落每散步出國門躊
躇四顧追憶壯歲相與考道論文共事一方者寥寥不可多覲而
封翁獨巋然矍鑠如疇昔方銳意釐定吾項書院章程將以陶鎔
一鄉者陶鎔閩邑人士胡天不弔遽喪典刑斯誠斯文之不幸矣
猶幸義方之訓垂裕後昆釗中老矣行見馨菴絢菴與及門從遊
之士砥礪琢磨共衍封翁教思於無窮不僅為閭里之榮且為邦
家之光也

竹臣文集

李王氏節孝碑記

王居壬 邑人

節孝婦王氏余嫡堂伯京兆公之女也性端慧幼貞不字年十九
以父母命納沈邱廩生李楨之聘為繼配于歸執婦道維謹事翁
姑曲意承歡楨甚宜之翁姑亦曰是善事我甫七載楨病故氏無

所出又無猶子以承似續誓以身殉投繯懸絕逾時復甦因以婦
供子職慰解高堂孝養益力一日侍姑歎歎言曰嗟乎無祿夫子
即世而又乏嗣李氏之鬼餒而兒婦旦夕填溝壑不足惜而老親
焉託請急為翁置側室天若不絕我李氏而令枯楊生稊肯堂構
延薄祚血食先人亦姑與婦之幸也姑曰善高諸翁翁躓之氏於
是大置酒延族人匍匐稽顙以志告懇懇翁族衆深然之僉謂此
婦明大義識深慮遠有士行遂卜諸馬氏馬溫惠淑慎入選循分
守禮家無詬誶聲遇氏尤有恩甘旨之奉薪水井臼之勞均分任
之後連舉二子剛數歲姑歿未幾翁亦棄養遺茲藐孤依氏為命
氏以一身迭遭大難屢慟幾絕志益勤躬親撫養飲食教誨恩勤
備至稍長令出就外傅丁酉戊戌連年水災田歉收氏量米度日
未嘗使二小叔廢學每當更深夜靜氏家讀書聲與紡織聲相聞

嘖嘖徹戶外比戶咸聞或至達旦不輟擇周氏為汝功配汝林聘程氏皆詩書舊族周氏素嫻母家教癸卯過門敬氏如姑事無大小皆稟命而行亦氏之誠有以動之也初翁屬二子曰汝嫂有大造於我家願天祐汝成人早立子為之嗣則老人瞑目地下矣時汝功有女氏愛之如己出翁言尚有待也里黨賢之上其懿行文部劉少岩郎中聞於朝天子嘉而旌之許建坊入祠以為鄉閭式今秋復為汝林成禮二叔感氏教養之恩請先立碑以風其德氏拒之再三親族敦勸乃允丐余為文氏余姊也不敢辭亦不敢譽因據實筆之付諸攻石之工

泥河兩岸官定船價碑記

光緒

張鎮芳

邑人

項邑南距城八里有泥河焉上游諸流之積潦盡匯於此形如釜底勢極卑下每當天降淫霖潰溢浩瀚渺無津涯行旅至此往往

有不能飛渡之歎於是鄰河居民伐木為船以濟行旅其好善者同宋氏之編竹獨修陰德其營私者遇陳平之仗劍未免居奇路當通衢往來者衆倘不定其價值必致啟乎紛爭苟有天水之災恐傷鄉鄰之誼諸父老目覩情形公同商酌爰乃請於縣主刊為條規兩得其平一無所阻探囊以取既無損於行人擊楫而前並有益於舟子不惟民無病涉亦且世有慈航矣謹勸貞環用垂永久鑄船價於左俾同人觀覽焉

陸邑侯釐定兵車章程碑記

宣統

馬秀芝 邑人

余嘗宦遊粵西忝膺民社深知兵車差徭科派民間為累滋甚未嘗不出示定價杜煩苛以昭畫一然不過一時權宜之計未必持諸久遠也而彼都人士往往譽出過情若感激推戴於不容已者自以小惠未徧至今懷慚客歲陸公來宰吾項大兵過境例當各

鄉派車支差然漫無定章一任差役科派甚至一車索價六七十
緡諸紳激不能平公聞急行出示曉諭各牌酌中定價每六十里
為一站每站一車發價十十文兩站十五十文項境支差無過兩
站者每牌支差不過一車並諭以後派紳在巡警局附設車馬局
嗣有滾單到縣由縣移局不假胥吏之手無論出車多寡均歸該
局經理由局向各牌索價各牌固不得延抗該局亦不得以少報
多致干咎戾勒諸貞珉存諸案卷公之示意至美法至善也以一
時之權宜更欲持諸久遠宜城鄉紳民感激推戴於不容已也爰
於立碑存案之時同登公堂祝公壽而頌公德仰答公實政子惠
吾民之仁於萬一即後之讀是碑者亦當諒我公為項民之用心
深且摯也公印爾瑛字和卿奉天人

按此碑後阻眾議未
立以上採訪稿

碑誌下

明故封監察御史張公孺人馮氏墓表

翰林院李

旻

弘治壬戌歲二月念九日封監察御史張公卒辛酉歲十一月念五日封孺人馮氏先卒俱以壬戌四月二十吉日合葬於邑城之西原墓則同鄉縣令張日昇與旻相繼而誌焉既葬厥子四川按察副使逢道慮無以昭示後人因琢石樹誌封於墓前遂遣价馳辭至南畿屬旻表於墓之陰旻與逢道甲科同年官殊而同處最久風晨月夕嘗道及先人之善茲不遠數千里而來蓋以誌篆旻知之既深言之必悉故也原公諱昇字景暘世居項城其高曾系無所考祖諱大公元未遭時不理歷險苦而存其家父諱祥隱德弗耀以勤儉清白立門戶母李氏出自名族溫厚恭謹治內有繩矩公生體貌修偉心量有容少承庭訓志欲紹先人之行奉二親非直衣服飲食雖一言動不敢少違與諸弟姪同居爨友愛甚

至不私所有處內外親族和氣謙恭老而弗怠至於是非邪正之辨則侃然無所回互男女嫁娶以時樂恬隱厭市廛好賓客遇人之東餒無聊輒周以衣食而不責報遠近誦其德以為模楷孺人馮氏天性純孝甫六七歲父太翁喪明居起候伺扶持夙夜匪懈十五六克修禮範既配景暘公執婦道姑嚴奉之以恭夫剛承之以柔妯娌有勞先之以身凡織紉奠助睦姻撫幼罔不如禮鄉人稱為母儀子四人長迪次遜次遇即逢道又次通公與孺人因材施教造就迪克家早卒遜及通皆責以務本修行知逢道器識宏遠進之邑庠精舉子業領成化庚子鄉薦登甲辰旻同榜第選知山西潞邑擢南臺御史弘治丙辰三年奏最勅封公孺人如子爵龍章多繡照耀閭里既而逢道清戒東藩事竣復南京道尋有四川按察副使之命方以便道遂歸省具慶為慰而孺人訃聞奔號中途

公之訃音繼至夫何欲養之心方隆而父母之年不逮也公享年八旬有八孺人享年八旬有六壽考德爵兼而有之且目及今日門第貴顯子孫盛多雖瞑目九原無所不快於心者矣矧子憲副能大厥官而恆恐違其親經綸調燮方將有望於時墓田之拓爵封之錫詎可涯埃也哉是以表諸不朽子孫時拜於其墓仰先德而永孝思亦或有感於斯故為之銘其辭曰

偉矣張公履道真醞賢哉孺人克孝且仁數貫先業佑啟後人有子侍御為時名臣抗志勵義直道是陳九重錫命特封其親既壽而康方貴而樂遽返蓬瀛鞭鸞駕鶴城西之原松楸馥鬱煙霞深護英靈淑魄正氣潛通玄光密照不負基菑構穫有效甲第雲初從斯攸兆子孫千億永膺榮耀立德在己垂世在德嚴範慈儀追之莫及勒茲貞石用揚懿則嗚呼深恩昊天罔極

閻太母張孺人墓表

韓 葵 長洲

日星河嶽之氣多聚於偉男子而幽閒貞靜如空谷有蘭滄海有珠其德潛其光流名媛淑女為閨中秀閨中師者天亦多聞世而一生然後日星河嶽之氣鍾於坤母與鍾於乾父將無同也余讀閻太母張孺人狀益徵信於斯孺人中憲大夫閻公德配也公諱煖字德煦於勝國丙辰成進士除戶部主草場能其官晉員外郎孺人相之事公如天亦如公之事君如天其忠同也後以剛直獲戾調南部郎公道白當路當路益高之尋擢姑孰守值權璫竊柄紳縉士夫鮮不為屈者公獨耿介孤行志恐不免孺人知及之力勸歸乃以病告解組養晦十年始起用再守平干是公之明哲保身孺人成之也公守平干時密邇日月清正之聲聞當宁文章列薦牘行將秉憲當是時正功名顯榮之地勢利熱鬧之場他人處

此不知一官戀戀當復何似乃一旦識氣數將竟致政歸田里傲然東山視富貴如草芥公卒知止不殆亦孺人左右之力居多余聞公之始祖自濠梁徙秣陵閱七世始誕公而孺人亦來自幽燕真天作之合也公之元配為邑巨姓高氏女封恭人先公卒而孺人相大夫者二十年大夫沒茹蘖飲冰者四十年逾八耋春秋高矣自從官以至家居一意輕綺羅重荆布縞衣綦巾可謂芟芟束帛歟而奉先祀則豐享大賓則豐歲時伏臘宴里社則豐抑何儉而有禮耶孺人其亦偉男子化身乎舉丈夫子者一垆補弟子員娶上蔡文林郎王公長女女一適汝南某某道羊公嫡子其曾孫治將營葬祖塋之側句不敏一言弗克違因畧述梗概俟採風者簪筆光史策焉是為記

閻鐸暨德配田孺人墓誌銘

王啟明 邑人

項邑閻氏始家金陵得姓於閻鄉蓋有周裔也明太祖時自濠梁荷戈徙項其始祖諱經者相土於清淨坡之南涯而耕焉亦如有周之農事開基云越六世贈公大器府君始起家自是冠蓋蟬聯人文霞蔚閻氏稱世族矣又三世而完初公生公其象賢也公諱鐸字志毅性醇樸讀書不輟蚤補弟子員與其季質勉同知名當世事二人以孝聞太夫人辭世太翁年尚壯公備極溫清羹必親調衣必手浣三十年如一日晚隱泉石間幾與世相絕真如避地桃源不知漢魏何有晉也先生殆有陶潛林逋之遺風乎配田孺人庠生田公諱某女也生而靜淑幼嫻女經知大義荆布相夫子以宜家天性勤儉晨興常先諸家人中夜紡績聲達諸戶當兩大入病革躬自煮粥和藥無間晨昏既葬嘗出簪珥佐不給某年月日亦先公歿至今梓里姻戚奉女宗焉舉二子長曰浩庠生仲曰

瀚處士孫七人次惟植庠生業儒曾元胥能世其家於是年冬十一月既望之三日合祔於城西祖塋旁之新阡其子若孫匍匐相州捧狀句余曰請先生一言為泉壤光余於閭氏有世好義不容辭而誌焉且銘曰

巖阿松青幽谷蘭香維先生之風與孺人之德源裕而流長既固

既安卜世無疆

以上閭氏族譜

趙自和妻苑氏節孝序

表甲三邑人

節孝庸行也而朝廷所以旌獎之者至隆極渥此豈為一人一家之榮名已哉將使聞其風慕其烈者由一家而及一鄉由一鄉而及國與天下上自朝士大夫下逮草野婦孺無不感激而興起於以磨厲世俗維持風化意至深也吾鄉苑孺人幼適名門不幸失所天斯時也垂白在堂黃雛未燥炭爰乎若干鈞之繫一髮孺

人以未亡人拮据於齏鹽井臼者四十餘年卒使孝養克全書香
永紹有以獨行其志而無憾吁此即擬以大易所謂地道無成而
代有終者夫何愧焉歲乙未月日請於 朝得 旨旌獎甲三
備職禮曹闡揚是其職司喜吾鄉之多懿行謹誌數語以附貞珉
俾聞風而向義者咸知茹蘖飲冰自可仰承 綸綍而相磨厲
於無窮焉則孺人之功當不徒在趙氏一門也已

節烈王田氏墓表

袁甲三

從來不惜一死為天下振綱常肅名教歷千古而不磨者在君則
為社稷在臣則為其主在妻則為其夫皆非易易也然吾謂妻之
於夫則有辨夫事不死不足以明妻道曾百折不回以與難則如
摩笄成山清風立祠皆節而貞者之不易得也至夫以病歿親老
子幼有必不可死而能終其身以孝慈全節者不可謂不難若伯

仲有徒椿萱無慮結禱未久襁褓無遺一旦鸞分鶴別亦必慕共
姜守義巴婦懷清何嘗不可作巾幗完人然節而不烈止難於一
死耳吾邑節烈王田氏何深有見於此而獨慷慨捐軀乎氏父晴
嵐公為邑明經博學無子以教諸女為樂節烈其四也生而貞靜
嫺姆訓能讀父書十九歲適王君肅恭四子華山為繼配越三載
丙午二月十九日其良人歿舅姑雖老定省有人子女俱無撫養
不事次日視殮畢輒飲刃而死蓋惟恐不能死徒守節為苟生且
惟恐不速死遂剖心以見志以視翦髮斷指更覺炳炳烺烺與日
月爭光矣烈何如乎余初聞此事竊歎氏之不惜一死其有功於
綱常名教也大且遠其獨能死尋常所不能死者易而難邑侯額
其門曰節烈流芳學憲錫之匾曰節烈堪欽洵不愧已既而於軍
機處讀鄂中丞摺奏已知題請建坊及閱學校公呈深幸吾邑中

大有人也

聖朝慎重倫常矜憐名節則非常之典應加諸異

常之人以見我

國家孝子之外又有如此女中丈夫者豈易易

哉噫氏誠千古不磨矣君子謂晴嵐公於是乎有子茲者同鄉諸君子為節婦毀石表墓請余言以誅之余深愧不勳盛舉且未能沈爵以奠謹直陳其事郵致諸君子勒諸貞珉也可作余致祭之言亦無不可

以上袁端敏公遺稿

明經余公墓碣銘

曹學禮 邑人

高邱之東汾水之曲水清而土厚地多古君子而慶時余先生尤其傑出者也公諱應昇字慶時世居縣東北八里之余家營其始祖元選公自江右遷項愛城東邱壑之勝遂家焉世業耕讀潛德弗耀數傳至晚翠公諱夢桂績學游庠以義行孚鄉里邑侯梁學博武均以匾額表其閭有子華先公諱榮祖修道路施義田克紹

先志華先公生子會公諱逢修 例贈承德郎再傳至安堂公

諱克重 例贈承德郎 晉贈中憲大夫即公之父也妣氏

張 例贈太安人 晉贈太恭人生丈夫子三人公其長也

仲諱朝昇字廷顯入郡庠食饒以軍功 加六品銜候選分府

例授承德郎 晉贈中憲大夫其行誼別有行述可考季諱

晉昇字接三邑庠生 馳贈中憲大夫以長厚見推鄉里慶時

公生而穎異才智不凡幼時在外太嫺母家見人讀書輒往聽焉

即記誦弗忘太嫺母遂令隨諸子姪入塾受業公嗜學如飢渴不

數年即能文成童從外傳任公濬川學任公以公貧不受館金尤

格外加意訓迪屬望切摯公亦刻苦自勵卧木橙者累月未嘗就

枕席由是學大進弱冠入庠試輒冠軍旋食饒董江都之下帷不

窺園范希文之蕭寺畫齋粥不是過也公事母至孝出入必告先

意承志無稍違每自館歸家督課兩弟惟嚴處家一秉至公所有
館穀悉置產業一錢不入私室道光庚戌仲弟以院試悞保被繫
累公竭力設法求脫恆夜弗寐憂勞致疾困牀箒者踰年有憶弟
七律詩至性溢於言表內行純篤有萬石君鄧高密之遺風焉至
於族戚近鄰有孤寡無依者恆多方周恤務令得所即肩擔傭販
亦格外從厚偶以疾購梨果公取惡推美即小見大非即聖賢無
我之量乎其在館授徒每先行後文有沈邑李氏昆仲不睦公以
天性委曲勸諭復為詩歌一章情韻纏綿李氏二子讀詩流涕遂
和好如初汝陽有申烈婦者汝東申萬齡之女也幼許字同里秦
氏子值夫家變歸秦四日而夫故女以死殉公感敬其烈為古風
一章七律五章以表揚之沈邑韓又新先生採入表節錄中湖自
兩漢隆鄧治文武明章諸帝重鄉舉崇學校設孝弟力田諸科士

生其間類多質行樸學之儒如潁川陳汝南許以及吾項諸應均有懿行垂後若慶時公者即擬諸前賢何多讓焉公天真爛熳與人交無城府雖文譽日彰弗自矜炫故一時名彥樂與訂交太和貞卿郭公同邑澣中高公菊圃靳公寵三閻公沈邑又新韓公均相與唱和切磋而又新菊圃寵三諸公交契尤深又新先生潛心理學其因知札記中有云余慶時論論文云有自然之體質有當然之節度如人五官四體多些子不得少些子不得又論近人作應酬文太膚濫使以作文者作官必不能處置得宜此極有見解又云余慶時論躬行君子曰人欲知君子不知君子即在行上欲知行不知行即在躬上其序人文稿云學之三十年於聖道全未得若祇就文上學雖終身無得也此言甚好觀此可知公之志趨矣公性簡默不以事物經心遊觀有節文行交修接物無遠邇必

以誠講士隨材器使必以實平生無赫赫名而質行不遜古人學禮以嫻世子幼時曾親炙其道貌聆其言論丰采迄今依依猶昨日事也公生於嘉慶二年十二月二十九日卒於咸豐元年五月十一日巳時享年五十五子男五長連茹王太恭人出娶時氏早卒再娶魯氏次連甲太學生娶師氏繼娶劉氏次連第歲貢生娶時氏繼娶丁氏次連紱邑廩生娶張氏繼娶彭氏次連藻娶曹氏女一適石氏太學生五珍俱衛太恭人出孫男六長師嚴邑庠生師熙連茹出師恭師覽邑庠生連甲出師遜郡庠生連第出師聖連藻出女孫八俱適名門曾孫男十一公之卒於今四十有餘年矣卜葬於西阡以王衛兩太恭人祔今其嗣君連紱將樹碣於墓道前以公事狀來丐為銘學禮於公嫻世子姪義不敢以不文辭謹序次本末而敬為銘曰

邱之高兮衆所仰汾之清兮波平如掌惟賢哲之挺生兮迥超塵
而月朗將與古人為徒兮溯康衢與擊壤繫潛德之弗耀兮龍無
雲騰驪有珠養德配有姬與美兮膝下繞鳳麟而競爽公靈歷千
載以長存兮想風馬雲車時游碧空以來往

琴軒文集

烈婦余倪氏墓碣

曹若枏 淮甯

聞之忠臣不事二君烈女不更二夫余讀史自范氏後漢書後皆
載列女傳是巾幗中有完人實堪與烈丈夫並垂不朽也猗歟休
哉若項城余應南妻倪氏者據亡友余孚山比部所作傳言氏生
有志操以禮法自檢飭年十七適應南應南性闊散不事生產貧
無立錫地氏紡紉自給歲多依居母家即應南衣食半取給於氏
十指閒應南無他技飢輒解衣履售人氏屢給之不怨也又念應
南無糊口資復售簪珥畀應南勸令事生業應南不能從反聽無

賴子適令他適氏誓死不為奪時母家亦貧不能給氏將歸夫家
僦舍紡紉為永久計未歸而應南歿親視葬畢遂留母家母憐其
少且無子勸令改醮氏泣曰生為余家婦歿為余家鬼因復以死
自誓靡他母難之潛與子謀事將諧氏竊聞之遂自經年二十有
三時同治三年六月朔日也距應南之歿凡五十餘日歲乙丑督
學歐陽公額曰節比共姜又奉

旨旌表如例先是氏之亡也

值流寇亂棺難行權葬母家朱灘店之堡東數十武後二十有八
年其猶子炳朗茂才丐余文以勒諸墓炳朗孚山族弟也均余畏
友余既欽烈婦之節又重炳朗之賢因昔得於孚山者書以歸之
爰從而為之歌曰

念勁草兮遇疾風緬歲寒兮柏與松倪氏之烈節兮將母同億萬
斯年兮官道之東

就正錄

戶部主事王公留浦墓誌銘

河南馮文蔚烏程學政

公諱金鼎字鎮九留浦其號也姓王氏明宣德間先世由晉遷豫之項城槐坊店至公曾祖芥亭公世德寔昌公父析存公由武生援例授職遊擊

誥授武翼都尉并以公

贈中憲大夫

善治產富甲一郡而性樂施予故里人以輕財好義額其門妣李太恭人生妣竇太恭人公兄金榜字芝圃咸豐辛酉拔貢官陝西知縣公其仲也公少聰敏與兄芝圃公下帷攻苦循循如寒素未冠以縣試第一人入學甲子之春文宗科考復以第一人食餼是年秋闈遂奪魁席乙丑聯捷成進士

欽點主事籤分戶部廣西司兼山東司行走是時也捐例方興各省餉項惟事報銷司會計者動多沾溉公乃鄙夷不屑竊念兄為秦中宰兩恭人春秋既高於是以終養假歸晨昏定省時時為孺子慕養親事畢盡禮盡

哀一一與葬父等其後家居課子并經理家人生業亦不為出山計懼地方有要務及義所不能辭者竭力為之如同治間賊踞尚店助餉從軍事定保藍翎光緒中鄭工決口辦理工料合龍後保四品銜皆公所踴躍從事而保獎非其願也曩者皖匪披猖勝克齋宮保駐師籌餉紳富有難色公慨捐銀三千兩以為之倡並聲明不敢仰邀議敘諸紳繼之遂集有成數公之深明大義為富豪中所僅見苟出而圖君其事業必有可觀者何乃杜門不出偃息以終老耶夫升沈者命也顯晦者運也如公則非關命運而出於性情蓋為所欲為行乎心之所安而已聞公父析存公晚年病瘥心煩善怒見公至輒色喜後病公侍側假寐者累月與兄芝圃公分居推財讓產無少爭競至於待人則必誠必敬凡有所求胥如其願以去其尤為難及者每歲關於親識中貧乏按戶予糧俾免

啼飢公父析存公故事也公克承先志並多所加增計一年需糧百餘石光緒三年歲飢公開倉振濟散粟千餘石四年並十年春均於槐店會館設粥廠就食者五千餘人全活無算十三年黃水之災公以舟泛餼糧沿村散放俟遷徙得所月餘乃止他如修義塾及文昌閣普濟橋與夫義塾中加脩延師文昌宮設課勵學每次所費數百金及數十金不等其他義舉尚多然即此數端而樂善好施已可想概見矣君陳言孝友而曰施于有政孔子曰是亦為政其即公之謂歟嗟乎世有掇巍科登崇秩聲聞藉藉誇廊廟而耀閭里及考其功勳於物一無所濟無惑乎當時則榮歿則已焉也以視公力行善事實至而名不彰德溥而位不顯閱時愈久入人愈深不誠卓卓然可傳也哉是公雖不樂為仕宦未嘗不多所設施也尚何憾乎公生於道光壬寅卒於光緒癸巳享年五十

有二原配沈邱太學生李公女繼配湖北武昌府遊擊淮甯趙公
女子躋瀛廩生配花翎候選同知山西長子縣知縣尉氏劉公女
躋瀛以光緒二十一年七月二十七日葬公於塋次因余曾視學
中州知公之為人函請為文余撫陳梗概為之誌而繫以銘曰

聯鑣甲第不可謂終窮觀政農曹不可謂不遇胡為乎遽樂林園
祇安孺慕良以人各有心位宜行素不願無施所欲與聚維山高
而水長彌增光於泉路

王氏
族譜

汲縣教諭郭公墓誌銘

高釗中邑人

公姓郭氏諱瑗字玉臣項城人生二歲母魏太恭人棄養依大母
陳太恭人繼母劉太恭人撫育成立性和順藹藹孺慕兩太恭人
鍾愛之長受父中憲公庭訓為文能得聖賢立言本旨弱冠補博
士弟子員旋食廩餼試輒冠軍年三十有八同治丁卯科舉於鄉

辛未會試挑取謄錄供職國史館初入挑時或勸公謁大府若得送實錄館敘績當以知縣用公曰循例籤分不願干進也同邑袁文誠公奉

命轉餉關中稔公操守謹篤邀赴戎幕公以親老

辭里居孝養滌瀟必豐必潔兩居苦茨哀毀盡禮假館教授以敦品植節為先務文詞一秉先正軌範遊其門者掇芹香紆青紫踵相接也歷應上蔡景賢書院本邑毋欺山房會文山房夾河書院之聘權皋比口講指畫廿餘年堂弟瑤以廩生貢入成均長男琴堂以歲貢生選授遂平縣訓導次男書堂由甲午恩科進士觀政比部歲庚寅公以館績報最例授汲縣教諭又八年以疾辭歸當公壯歲文學品行蔚為時望若稍貶風骨以圖進取必能膺臚仕展宏猷何至潦倒二十年投閒於冷署以青氈老時論惜之謂公之不遇於時也然使公得所遇膺臚仕展宏猷鞅掌於簿書

馳驅於戎馬焜燿喧赫不得一日休假於里閭又烏能遂孝養之
初心喪葬盡禮食詩書之厚報科第蟬聯如今日也此中得失之
數孰重孰輕公辨之早矣光緒二十有八年三月初八日疾終於
里第年七十有三以子貴 封中憲大夫祖考躋菴公祖妣陳
氏考維三公妣氏魏繼妣氏劉皆 贈中憲大夫太恭人諡吉
某月日葬公於祖塋東偏之新阡從遺志也余與公為同年交諸
孤以行狀丐余銘銘曰
養親不以祿而蘭膳常足遺子不以金而芝誥在身先壟之東巋
然幽宮爰及後裔共式清風

節孝師高氏墓碣

高劍中

節孝婦高氏余族姪化智之女也幼許字於蔣家莊師春華之子
錦心及長母家聞錦心有癡疾意猶豫氏謂母曰命也命造自天

人可憎而逃乎十九于歸執婦道惟謹事翁姑委曲承歡春華素嗜酒與戚友相過從劇飲輒大醉氏出饋饌供之甫十載錦心殁氏無所出又無猶子以承似續翁以酒疾不能理家政氏乃大置酒延族人匍匐稽顙而請曰夫子不慧無祿而又乏嗣師氏之鬼餒而妾旦夕填溝壑不足惜不忍見翁無後以湮宗祀乞以夫之從弟錦章為翁後僉曰善此婦之識邁等倫允之乃相俶於夏氏景雲之女以為錦章配夏故詩書舊族明大義入嗣與氏相愛如手足無何翁疾大作手顫不能舉箸頭搖蕩若播麈不克以口就栝棧將廢食焉氏與夏氏日侍三餐一人捧翁一人執匙箸而飲食之閱二十年翁得享天年以卒囑曰昔唐氏乳姑姑願孫媳如唐氏賢以為報今吾媳侍疾無倦容惟祝天祐錦章俾獲三子以嗣冢婦而彰其孝則老人瞑目無憾矣錦章果相繼舉三子氏

撫其次子淑平為嗣如己出馬里黨賢之上其懿行大吏聞於

朝天子嘉而旌之許建坊入祠以為鄉閭式光緒二十四年

氏以疾終年七十有六里人謀碣諸阡浼文於余因筆其事以貽

後之人

以上竹
臣文集

楊朗軒先生墓誌銘

黃舒昂 湘潭

公諱明德字釋經號朗軒姓楊氏河南陳州府項城人也始祖諱
進明入國朝遷於項北七十里侯家樓村世業耕讀潛光弗耀

高祖諱宗儒以忠厚起家曾祖諱九哲祖諱重慷慨好義世有陰
德父諱華修字茂先型家以禮讓鄉里稱之茂先公生三子公其
季也生而穎悟數歲時聞庭訓即能會意弱冠應試數奇不售讀
書之志不少衰好看先儒語錄嘗鈔訂數帙以資省覽家居事親
生盡懽沒盡哀事兄恭謹雖勞不怨教子寓嚴於寬督以準繩長

伯漢次仲唐肫肫以古聖賢志事相勛蓋得力於嚴教者深矣公嘗重修潁水寺移佛廟而躋至聖於正殿前建講堂旁列迴廊出入禮門義路經營三載卒底於成乃敦請名師主講從學者若項沈淮鹿諸邑均聞風而至數年以來遊庠食餼者指不勝屈更於課文外講究實學人盡興行當其時高邱寺有社課郡中南頓各有社課皆聯絡為一氣郡中積學宿儒如王柳圃曹次榿夏默齋余棣棠諸先生萃集一時皆深於理學恪守程朱者也伯漢仲唐承公之志得以親友共學贊成遠大之業以繼昔賢而開後進蓋公之扶植人才昌明正學又如此嗟乎今世率以道學為諱鮮有談及小學近思錄者一聞居敬窮理聖功王道之說如嚴冬服絺絺異說確宗儒先挽流俗於正軌進髦士為英賢懿乎其識高

而其功偉矣然公素無講學名惟以篤行自勉人有負債日久弗償直一筆勾之不與校鄉黨或有爭端公為之剖別是非直者德之即屈者亦帖然無後言居恆以利濟為懷如築張寨以保鄉鄰濬趙黃溝以洩坡水遇歉捐錢賑米以甦民生遇疫檢方施藥以療人病善行難以枚舉而公則曰此吾職分所當為不足齒及也公生於道光六年十一月二十五日卒於光緒十二年十二月二十四日享年六十有一配胡孺人淮甯處士諱永安公女孺人孝敬勤儉仁恕寬厚生於道光三年八月二十二日卒於光緒二十一年八月十二日享年七十有三子二凌霄邑庠生凌閣己丑恩科舉人孫三人寶璋思慶綸慶公以某年月日卜葬於宅北十數武子山午向孺人祔葬伯漢仲唐介其友人來請銘銘曰昔在有宋斯文興起厥惟太中善於教子荷歟先生繼美前型仁

義式穀詩禮趨庭二子觥觥學行卓越恪守正宗深入理窟維聖
有的維賢有途淵源家學曰程曰朱世教不明異端競作誰其祛
之天清宇廓先生教子厥有義方後學之軌吾道之光豐阡莪莪
松楸鬱鬱幽宮奠茲千古不沒有嵩載高有穎載清山水靈秀護
衛佳城

楊君伯漢墓誌銘

黃舒昂

陳多隱君子余嘗讀陳郡賢儒考一編見近世有若載公黃先生
迂村樊先生有若又新韓先生柳圃王先生蓋皆言坊行表可法
鄉閭可型後世者也乃今又得楊君伯漢焉君諱凌霄字步青號
達齋一字伯漢世居項城北七十里侯家樓村以耕讀忠厚世其
家高祖諱九哲曾祖諱重祖諱華修父諱明德世稱朗軒先生予
嘗銘其墓矣君資性淳厚年三十一始入邑庠一日於村館主人

敝篋中得性理一本周子太極圖說通書也讀而好之留心正學自此始後應試在郡購得夏峯年譜中州八先生凝道錄向學之心愈切及見同里余棟堂先生問初學入路示以小學近思錄旋於書肆得之始知詞章以外有正路可以直登聖域自是凡有所得即自記錄存心行事分別善過不敢自欺為學務求約守不事泛覽所輯書有反約窮源錄庭訓述古錄宏農名儒考學顏彙鈔觀法隨筆永誦詩鈔愛邵詩鈔皆時常展讀者也其遵先人遺命輯鈔者有為二南詩鈔箴銘輯要其餘事親則有奉親錄教子則有蒙養紀事訓門人則有記過簿而生平心得之書尤在讀朱輯要錄蓋恭讀朱子全書而撮其最精要之旨也觀其著錄可想其躬行矣君篤於孝友尊甫先生患失血瀝陳己罪焚香籲天為親永壽親沒哀毀骨立喪葬悉準古禮廬墓三年每哭輒痛不自勝

年甫四十髮白殆盡客歲八月母太孺人病瘥君瘥初愈卧牀呻吟然晨昏依依堂前不忍一刻不見母也不幸太孺人沒君一痛而絕移時方甦病起後竭力營葬隆冬盛暑負土成墳兄弟仍廬墓側君之居父喪也三日始飲稀粥百餘日不櫛髮頭幾禿及居母喪亦然雖病垂危仍不食一米入口亦吐病稍聞乃進稀粥遂不寢牀尊長勸之亦不聽也君與弟仲唐極友愛仲唐名浚聞已丑舉人相勉為程朱性理之學君沈篤仲唐敏銳君善守仲唐善悟其道義切磋壘篋唱和洵極人倫之樂事與之所致發為謳吟著有怡怡詩草有所得輒呼仲唐並座同讀得意則相視而笑感慨則相對歎歎仲唐每告人曰吾兄弟互相友亦互相師也又曰吾兄友愛之誠四十年如一日君孝以祀先仁以錫類建祠追修四代神主祭儀仿家禮命仲唐輯家規特以祀先一篇冠首居喪

在廬中卧病每日晨起必拜墓入祠必焚香參拜杖而後起病亟時逢祖先忌日猶勉行四拜至於平日厚於親黨賙於戚眷無不曲盡其情有高氏姑者其墓去南頓官道側半里許每進城必拜姑墓其事類是者甚夥君尤篤於師友之誼李怡亭先生君業師也君左右就養事師如父如是凡六年及師沒痛哭數日葬時為文致祭後凡祭必有文拜墓必痛哭屏絕酒肉心喪三年君狷介剛直慄乎難犯而與鄉人處慈祥坦易油油如也其接引後學諄諄不倦隨人淺深委曲詳盡要以敦倫勵品反身自得為貴其有至性者多於言下感悟至於遺言懿行及門諸子輒筆而述之自錄日記自壬午訖乙未近千條仲唐檢遺稿又錄得百條君嘗為一事必自問曰是足餒吾浩然之氣否又曰人生大事孰有逾於讀書學道者哉又曰名利二者最壞事是一熱字能冷淡一分人

品便高一分又曰有纖毫似聖賢處即不敬其身虧體辱親罪莫大焉病中猶曰人死亦常事但未聞道而死則生為徒生死為徒死矣可乎哉因慨歎不已君識卓守定銳然以古聖賢自期生平於宋五子書講肄體驗反覆不置即至疾病呻吟而此志未嘗一刻懈也今年春精神漸復哭泣之餘猶日溫小學數篇欲如薛仁齋先生之必讀萬遍而後已胡一年未終舊病復作遷延兩月竟不愈臨終時心清氣定坦然而逝時光緒丙申五月初三日也士林聞君沒咸悼痛之君雖身不出里閭而維持風化扶植倫紀未嘗不日履人心世道之憂雖降命不永業不克就然其志堅力苦學粹行完則固質諸天日而不誣揆其潛心性命洞澈理要信之篤執之固蓋超然於世俗記誦詞章權謀功利之外而直繫洛閩正學之傳者也其與陳郡賢儒言坊行表可法鄉閭可型後世

者豈有二乎哉君生於道光某年距沒之歲享年四十九娶周氏子四長貴卿次渭卿將成童而殤次寶璋次幼殤女三長殤次字傅氏次幼嗣子以某年月日祔葬於朗軒先生墓側仲唐孝廉以狀來請銘余不敢辭銘曰

嗚呼君之學足以達天而不永其年君之善足以復性而偏促其命豈斯道之多阨兮抑天道之無常問之太空而無言兮羌終古之茫茫然而儒先正學之緒藉君以傳後來一綫之脈藉君以延其行可質諸鬼神其德增光於河嶽我銘匪私以示後覺

以上明道書院

袁太母劉太夫人墓表

兩湖總督張之洞南皮

光緒二十七年四月二十有九日太子少保直隸總督袁公為山東巡撫以母喪電聞於行在時東西洋各國駐兵京師分據

天津各處得

旨山東地方緊要正賴通籌全局著賞假百日

在署治喪少保復籲請回籍營葬又得

旨俟大局定後再行

賞假世凱之母教有義方深為褒許當感激奮發移孝作忠少保

聞

命感泣不敢固辭其冬十月移督直隸十一月

大駕

還京明年秋七月收回天津八月少保以葬有期再具疏請奉

諭屆時降

旨先

賞太夫人正一品封典九月少保賞

假四十日

賜太夫人祭一壇復奉

懿旨賞內帑銀三

千兩少保奉

命即行一月馳至項城十七日癸卯奉太夫人

之喪葬於項城東北鄉師寨河南巡撫遵

諭致祭遣按察使

將事僚吏畢會閤里聳觀以為殊榮太夫人姓劉氏河南項城人

年二十歸於

贈光祿公初光祿公娶於劉生子世敦劉夫人

既歿繼室太夫人生子世昌早卒次世廉次即少保次世輔次世

彤孫克明克定克勦克成克莊克正克勗克讓克劬克暄克倫克
環克昭克善克端克權克誠克德項城為皖豫要道咸豐同治間
數被兵光祿公鄉居治團練禦賊家事一付太夫人承事祖姑郭
太夫人姑王太夫人能得歡心光祿公早世太夫人教養諸子督
課嚴至諸子並以才能自奮積功至道府大員而少保功名最顯
少保出嗣從父觀察公太夫人訓以事所嗣如所生少保奉養二
母以孝謹聞少保既早貴性剛烈任事敏銳太夫人戒以勿任性
勿苛察言動必謹如有不稱貽君父憂予不受爾祿養矣少保
悚惕受教奉使朝鮮治兵畿輔巡撫山東太夫人皆就養見少保
治事勤慎則喜為加餐拳匪之變起於山東蔓延於直隸中外阻
闔訛言日聞太夫人則語少保宜辨別是非昌言於衆毋怙禍患
少保累疏言於朝而自治其境內畿境大擾東境晏然方事之

殷或有請移家者太夫人指池水為誓與城存亡既而洋兵北來

兩宮西幸太夫人已寢疾感憤涕泣至於彌留猶勉少保兄弟以奉迎

乘輿盡瘁事國為言不及其私其後少保以直隸總督迎

鑾於順德還鎮於天津而太夫人不及見矣太夫人生長富貴天性儉約而好施濟三年大旱十三年大水皆出巨貲賑濟全活無算生於道光十二年二月二十八日薨年七十少保曾祖母郭太夫人實生端敏公孫文誠公相繼為中興名臣

光緒初年郭太夫人壽百齡特諭褒賞海內學士播為詩歌越二十餘年而太夫人復以義方之訓再奉

詔宣恩禮稠疊袁氏為汝南巨族當咸豐用兵江淮同治平定捻回迄於光緒再盟海國三朝大兵事端敏公文誠公以及少保三世皆起臺省

為將帥宣力行開勳閥之盛當代罕儔而閨閣之內再以德行仰

蒙 褒賞後先輝映尤為盛事史稱陶桓公位業為兩晉之冠而備述其母之賢明陶公督八州登三事猶時舉亡親之約以自警而同時虞潭之母定夫人亦以忠義教其子歷杜弢蘇峻之難當時稱其憂國之誠及歿成帝遣使弔祭賜諡少保勳望今之陶公太夫人垂教類陶母憂國類虞母榮遇則繼美於郭太夫人又非虞母所及然陶公貴不逮養虞守名位未至即端敏亦貴志中路猶有貽憾若太夫人可謂備德全福也已少保書來請表墓之文援舉其大者著於篇以示後世

劉太夫人碑記

袁保純 邑人

光緒二十有八年壬寅孟冬月朔越十六日癸卯將奉 恩賞正一品封典 誥封一品太夫人長嫂劉太夫人安窆新阡葬之先日四方來觀禮者車以千計絡繹咸集四姪世凱亦自直隸

總督任所請假回籍葬母欽奉

慈禧端佑康頤昭豫莊誠壽

恭欽獻崇熙皇太后懿旨賞給太夫人正一品封典

賜祭一

壇又由內帑

頒祭葬銀三千兩且

諭為太夫人諷經設

供

殊恩異數曠代所稀甚盛典也觀者莫不嗟歎以為厚德

豐報理固宜然而族黨子姪則尤感慕欵欵有弗能已於言者太

夫人南頓劉氏年十九以賢聞

贈光祿公受臣大兄原配嫂

氏有末疾思得淑媛以佐家政太夫人於是來歸時光祿公母王

太夫人大母郭太夫人皆在堂光祿公方治園練禦粵捻家事一

委太夫人上則孝養重闈下則教撫羣稚每能先意承志得二老

歡郭王兩太夫人咸欣顧之故於原配長嫂之卒即命正位為繼

室保純等暨諸姪幼多蒙其顧視煦寒問燠靡所弗周既而光祿

公即世郭太夫人年百齡王太夫人亦八旬老且疾矣太夫人含

悲茹苦強顏承歡晝羅酒漿夜勤縫紉盡慎盡禮以終兩太夫人
之世不聞有喪子若孫之慟婦兼子職人尤難之賢孝之稱翕然
里黨固不僅娣姒宛若輩遜讓以為弗及也竊維吾袁氏自端敏
文誠相繼崛起以忠節聞天下然世承清白篤守儒素太夫人秉
性柔嘉夙明大義雖待人御下一以寬和督責諸子獨嚴而有法
每述先訓稱忠孝以相勸至於顯貴不少寬諸子秉訓慈闈宣力
王室三姪世廉五姪世輔六姪世彤先後以監司郡守郎官之
屬敷歷中外聲績踔起四姪世凱遂總制畿疆屹然為國家柱石
重臣顧太夫人雖履豐席厚樂善好施周濟貧乏無恹色而未嘗
不以儉約自處每當諸子晉階受賞輒屏賀客申訓迪以滿盈為
戒前歲就養山東年屆七秩有請稱觴上壽者輒峻拒之惟時以
和議未成

乘輿未返西望咨嗟至於餐寢俱廢觸發舊疾竟

以不起嗚呼慟哉時辛丑四月二十九日也卒後四姪獨以山左一隅保障東南半壁底定海宇奉 駕還京皆秉諸慈教為獨

多雖 朝廷亦以教有義方

特嘉褒許

恩施稠疊

曠典飾終非惟吾族之榮抑亦志乘之光矣諸孫十九人多聰穎秀發克繼前休所謂其德靡悔既受帝祉者非歟保純等幼蒙慈覆感豈能忘茲因念食報之豐追溯夫懿歟之盛謹誌其榮榮大者勒諸貞石以備後世子孫有所考覽焉其他美德善行則朝野士庶里閭婦孺類能詳言無庸縷述矣

袁母劉太夫人墓表

侍郎沈雲沛 安徽

宇宙菁英之氣鍾於淑秀為獨厚天生名臣以開佐命之勳必生賢母以永詒謀之澤積厚流光由來舊矣雲沛籍江北旣聞咸豐中葉項城袁端敏公任督漕使仗鉞專征肅清髮捻長淮南北至

今賴之洎光緒丙午巨浸鹽漕兩荒端敏文孫述之觀譽以蹇運副使來治淮北雲沛時過從聆緒論觀譽自慨少孤多難尊公子久閣學盡瘁王事尊慈高太夫人春秋高治家教子惟生妣劉太夫人是賴每述懿徽欷歔涕下兢兢以弗克負荷為愆雲沛聞之肅然起立迺知觀譽之大有造於吾鄉其仰承太夫人之澤正未有艾也歲庚戌郵部四政需材辟調觀譽來佐部事觀譽以雲沛相知深述太夫人行畧屬為表墓之文雲沛舊史官也義不能無言謹按畧稱太夫人繫出順天劉氏笄歲歸侍閣學公溫恭勤慎事高太夫人謹高太夫人中年多疾患肝風積劇弗瘳太夫人禱於神願減己壽以代閣學以海防積勞左體患偏痺動轉不自如太夫人侍湯藥奉衣食聆音譽理纖細靡遺雖盛暑未嘗御巾扇恆日昃不遑暇食每霜朝雪夜露立中庭焚香籲天誓以身殉潛

刲臂肉和藥以進閣學病篤既絕復蘇侍疾三年積誠積瘁遂患
痰喘目昏等症諱病不稍懈服事之劬有孝子賢婦所難勝者閣
學故後奉櫬歸葬心力俱竭家太貧食指繁冗甚太夫人茹蘗飲
冰躬親操作雖艱窘中庶事畢舉不以緩急有無累高太夫人秩
然整肅一如閣學在日課諸子讀嘗至漏下三鼓中夜篝燈誦讀
聲刀尺聲相繼弗息長子世榮多聰穎未舞勺下筆千言沈毅負
大志每見太夫人持家艱苦狀輒飲泣廢食攻書益力十三歲以
績學殤次世同自補博士為南皮張文襄招至鄂厯任方言學堂
商務清丈堡工羊樓肖茶釐各局事遞遷知府年未三旬以疾終
時論惜之三世傳即觀督蚤歲入庠個儻不羈所至以清蠹弊恤
民隱為亟辦揚州巡警淮南鹺務總局聲稱藉甚婦孺無不知名
者官淮北三載適承積敝教育未興迺廣學校杼柚其空迺實倉

廩帛盜橫行迺創警警商竈久困迺增餘引政教在人去之日商民攀送數百里觀警遜謝弗遑備述達訓皆感歎弗衰烏虜太夫人芳徽未邈獨留此教思絲絲相承不敝關繫豈微眇哉四世威奉高太夫人居未仕曲得親歡遵遺訓也太夫人沒於光緒乙未秋八月當咯血病篤慷慨全節之日正中日戰後和約告成之年太夫人痛念閣學為旅順盡瘁藩籬一潰先烈頓隕自聞警信日鬱鬱長歎至是乃痛哭失聲血益涌吐時惟觀警侍側召至前執其手而泣曰汝父見背吾即欲相從地下念汝母年高侍奉無人今汝諸兄授室汝長姊已于歸家事復何慮獨痛國事至此汝父在天靈爽當亦悲憤不置吾何心偷生人世耶吾死而汝等奮發忠義纘揚前烈是吾子也言訖復嗚咽不已竟以身殉時年三十有九里人稔聞懿行大節願請

旌表節孝

詔准如例

其榮華千古固已聲震朝野何待雲沛私有論述敢援至敬無文
之義舉吾鄉人士所躬被者推源溯流益歎太夫人承先啟後能
使觀譽堅忍淬厲微太夫人之教無以成觀譽之名微太夫人之
烈無以成觀譽之忠觀譽年方盛強秉斯意以勤相國家其設施
甚大其志量甚遠它日勛業不朽即太夫人教忠之訓亦永永於
不朽太夫人墓在豫之陳州郡城西郭外於光緒乙未年十月卜
葬初 封太宜人今 晉封一品太夫人子四孫甥女八宣
統二年述之觀譽以太夫人建坊告成迺復擴塋牆厚封樹長子
世榮字綱之 馳封光祿大夫初以幼殤葬於先塋之側嗣原
聘李氏守節來歸義得無殤今就故地埒入太夫人塋內體親心
也因并志之 以上表
氏族譜

孝烈閭省齋先生暨德配張孺人節孝碑記 楊凌閣 邑人

國有烈士臣道以立家有節婦妻道以維自來奇烈苦節其後必
昌固天道往復亦人事有以致之也而千百世下聞節烈軼事猶
肅然起愴然動者益足見人心之不死况生同時居同地乎如吾
項閻省齋先生以烈死其配張孺人以節終尤可感焉先生諱淑
震省齋其號也讀書刻苦自勵弱冠列邑庠旋補增廣生與同邑
曹琴軒沈邱韓又新淮甯曹次樞以正學相勗輯聖賢要語為洗
心譜精思力踐同人罕有過者咸豐十年三月十九日皖寇突至
先生率家人逃難母衰扶之徐行數促之去不忍婦女從者數十
人至汝境秦破樓賊騎迫之先生厲聲罵曰反賊敢誣善良耶賊
怒殺之母與妻幸免賊去即掩尸其地邑人義而哀之私諡曰孝
烈時張孺人年二十三遺孤松墅方數齡日夜泣絕水漿誓以死
殉忽自悟曰翁姑老子幼身死誰賴乎且遺骸在外何忍亂稍定

請於翁將啟葬翁難之孺人跪泣曰生作閻氏婦死作閻氏鬼吾志決矣啟攢先生面如生見者咸驚異焉葬村南新阡家素貧自此益困日用惟取給績紡越二載翁病歿竭力營葬期功之喪相繼不絕皆孺人獨任之又兼烽煙頻警饑饉游殍食藜藿饜糠粃無怨心奉姑或蔬食無菜果輒自憾曰負吾母矣甚至一飯不食留供姑與子姑前仍作歡顏而閤室飲泣不知凡幾矣有至戚憐其苦而詭勸之遂絕其人任餓死不為非義干惟曹君琴軒與先生為夙契屢調濟焉姑病籲天求身代及歿哭之哀族人感動醵金買棺以葬命子從堂伯授讀每言書香難繼泣下沾襟子或博戲廢學答責不火恕且泣曰吾豈不愛汝以汝父祇遺汝一身汝行不軌吾無望矣汝父日夜發憤竟賫志以終汝不能繼志述事吾何面見汝父於地下乎子亦感泣知勉於學年十七即為童子

師夜歸孺人篝燈紡績伴之讀踰冠即有聲黌序人謂先生有子子娶徐氏繼曹氏愛如女有妹早孀二子俱幼妹又亡為撫養之俾成立及病革囑其子曰汝祖父母歿未能成禮勿厚葬使吾獲罪地下言訖而瞑嗚呼若先生與孺人其乾坤正氣所鍾歟語云士窮見節義世亂識忠臣道妻道一也而烈烈偉節萃於一門求之古今亦罕覩焉子字濟源學品為人推重諸孫能世其業其昌也宜哉今先生歿五十年矣鄉人好義者猶仰先生之烈與孺人之節欲彰其美而壽諸石屬閣為文以紀之余交濟源深且久義無可辭勉為之書

鄧君文垣墓誌銘

楊凌閣

交道之難久矣平生知交不過數人又或散處遠地不能時聚首為憾其自髫齡訂交地通會勤別少久輒致書商學或託詩言志

往來無虛日而察言觀行善勸過規雖直而不怒雖數而不疑無有如吾友文垣者噫難已文垣少吾兄伯漢七歲於予一歲長耳兄事吾兄而弟視予即一家昆弟不是過丙申夏五吾兄病歿文垣哭之痛曰吾道孤矣不啻奪吾手足也越十年而文垣歿知交零落予外何人且病中執手傳誌之作諄屬再三安忍不銘文垣耶文垣諱錫章項城鄧氏漢高密侯裔曾祖諱萬吉字薌田乾隆癸卯舉人仕至汝甯府教授曾祖妣氏王祖諱玉皜字瑤房嘉慶辛酉拔貢甲子舉人任陝州學正祖妣氏竇薌田公喬梓繼美家學淵源皆以宋儒為宗主考諱伯盤字子安太學生妣氏楊文垣三年始免雙親繼逝女兄二人亦幼零丁孤苦賴堂兄麗邦先生撫之成立而學業指授伯父筠岩先生之教為多嘗與堂兄筱筠晨夕論文切磋磨厲筱筠登壬午賢書文垣亦於是年遊泮旋食

廩餼秋闈屢躋遂絕意進取後進從遊日衆隨材造就無少長皆推以誠暇則編籬種菊秋深花盛招知交吟哦其中號曰友菊以自况因平日守正不阿同人交推經理書院事出納會計必公必慎適閣遊學於外來城時火所日與詩酒唱和談古今事以為快者惟張君馨菴王君北初數人及馨菴入都供職文垣亦力辭書院公事而身弱多病閉戶課子而已乃因嫌啟覺誣來意外氣鬱不伸病體益劇矣乙巳六月在固陵聞之即致書寬解已晚不可抹及十月省視奄奄在牀談平生志事仍不衰也丙午正月又來省視病將革矣昏曠中猶自歎曰吾已虛過一生老弟勉之留數日灑淚去旋歿二月朔二日也生於咸豐乙卯年五十二娶郭氏溫柔敦厚婦德兼備子漢東能世其業女二長賢孝將及笄殤子哀而傳之次適候補縣丞袁克堪漢東於丁未正月二十六日卜

葬城西北隅劉莊新阡文垣質直好義外和厚而內剛明與同人處不求甚異而矚然自不可污待子姪窩嚴於寬恩誼甚厚而慄然不可干以私獨以平生不識父母音容為終天憾與朋輩談及淚涔涔下入庠時追題考妣神主為文致祭哀哀孺慕之忱觀者感動學務崇實不拘拘帖括習讀宋儒書知好之於方外因果之說弗溺焉詩則感物興懷自爾成詠其淡逸之趣令人想像不盡亦得於天者然爾惜多散佚聞於敝帙中得其殘稿斷句反覆咀哦而平生之感彷彿遇之不覺神志接而聲氣通躑躅翹企不容自己焉嗚呼已矣已矣予之訂交自文垣始又以文垣終已可勝慨哉因唏噓為之銘曰

竹挺然而自昭其節玉渾如而自抱其璞任孰瑕而孰疵仍不雕而不琢慨相交踰三十年未嘗見其刻方以為圓清清以為濁學

非異自高行非奇自卓我銘諸幽豈區區阿好之私表先正以勛後覺

閻母田太君節孝碑銘

閻松墅邑人


節孝婦姓田氏沈邑庠生如蘭女副貢如芝胞姪女也幼嫻姆訓凝重端嚴甫數歲如蘭公為說女誠閨範以及往古婦人女子節孝貞烈恍然若有動於心異日為他女子述之皆歷歷無所忘事親怡色柔聲定省無缺年十九歸吾族伯淑堯公挽鹿車操井臼裙布釵荆綽有桓少君風事翁姑克柔克順相夫子敬戒無違宜室宜家不數月而鄰族稱賢婦無異詞咸豐庚申皖匪逼項氏先奉姑避難城中翁夫留守門戶翁諱錫鑑績學未售夫淑堯務農頗通文墨明大義匪猝至父子俱被執迫之降不肯脅以威又不從遂同時遇害氏絕粒哭泣欲以身殉哽咽不能成聲死復甦哭

仍不已姑泣勸之哭愈厲父如蘭往諭之曰汝死於義得矣其如
孀姑何萬一汝死姑亦因之而死何面目見夫君於泉壤乎且向
所道女誠閨範豈以一死重乎又為述楊忠愍泰山鴻毛之訓諄
諄勉以孝姑立嗣氏泣而從命始勉進飲食收翁父子之尸葬祖
塋焉後抱夫胞姪松固承嗣因流寇迭亂不休人惴惴朝不保夕
非死於兵即死於餓田氏一年幼婦女奉孀姑撫繼子顛沛流離
艱苦萬狀孤枕寒衾淒風冷雨之中不知下幾許血淚矣然卒能
使姑以壽終子能克家此烈丈夫補天再造之事何期一婦人而
優為之乎嗚呼難已賢如田氏可以風矣氏卒於某年二月二十
三日享壽七十四歲計守節五十三年其嗣子恐久而湮沒弗彰
也爰勒石墓前以永不朽銘曰

千古節義淑姬共姜維田太君實相頡頏國運中衰小醜跳梁舅

死夫殉一門堪傷拚一死以相從奈孀姑之在堂忍死奉姑艱苦
備嘗嗣子幼弱教有義方松柏競節慈孝名揚庶他年旌表入祠
不愧奉俎豆馨香

以上採
訪稿



項城縣志卷二十

麗藻志九

雜記

奔勢

應場邑人

蓋棊奔之制所由來尚矣有像軍戎戰陣之紀旌旂既列權慮蜂起駱驛雨集魚鱗雁峙奮維闔翼固衛邊鄙或飾遁偽旋卓轆駟列羸師延敵一乘虛絕歸不得合兩見擒滅淮陰之謨拔旗之勢也或匡設無常尋變應危寇動北壘備在南麾中棊既捷四表自虧亞夫之智耿弇之奇也或假道四布周爰繁昌雲合星羅侵逼郊場師弱衆寡臨據孤隍披掃強禦廣略土疆昆陽之威官渡之方也挑誘既戰見欺敵對紛拏相救不量進退羣聚俱殞力行唐突瞋目恚憤覆局崩潰頃將之咎楚懷之悖也時或失謬取奔攝

北還自保固完聚補塞見可而進先負後尅燕昭之賢齊項之德也長驅馳逐見利忘害輕敵寡備所喪彌大臨疑猶豫算慮不詳苟貪小獲不知所亡當斷不斷還為所謀項羽之失吳王之尤也持棊相守莫敢先動由楚漢之兵相拒索鞏也

漢魏百三名家集

知縣張應宏保項記

先是崇禎十二年正月流寇三百餘乘夜劫城項人士素不習兵心膽恒怯爭投隙地以避之賊黎明滿橐而去明年厯陽張公尹項繕城池練兵壯城中粗安而郊外衣食聊足者皆僦居城內適闖寇二隊精兵自潁州一口橋遣銳騎七百飛奔夜至踰堞縱焚縣民奮力格鬪公率衙兵據鼓樓張其聲勢指調守備黃士英督鄉兵截殺百餘生擒者無數賊失利喪氣而出至五里外遇老營涕散遁去自是項民義勇倍生凡賊之逼項者晝則鏟尾夜劫營

伍諸賊皆知項民之悍也不敢薄城以陳焉次年有袁營大賊近城之東南隅立營欲久居為攻城計公令人夜縋北城潛至高邱臺發連珠礮鳴鼓賊驚以為官兵至也遁去無蹤項當寇掠交訖之餘保全無恙公之偉伐殊勳殆不可沒云

舊志

荆楚山水遊記

馬世驄 邑人

昔司馬子長喜遊其足迹所經詳見自述幾遍於宇內固非役於景物將以盡天下之大觀助侷儻非常之氣今觀編次史記縱橫馳騁光怪陸離允若所言自表文采於後世古之善遊者類如是余以秣陵後學株守一隅見同井蛙戴盆何以望天竊用自愧每欲縱觀宇宙名山大川以廓其胸襟廣其聞見而志未及遂歲在癸丑 聖天子位天德而龍飛善政聿始大澤流輝 特簡賢俊 恩禮有加以故長白傅公膺茲 寵命移守長沙先

是公宰銅陽余叨列西席與諸公子聚處四載相孚以心而同漸
漬於麗澤嗣是屢辱問遺期以後會余因思荆南名區長沙為最
三湘七澤衡岳巫峯山水舊稱佳麗而余皆未寓目於其際也公
業側席旁求余於是烏可以不遊哉况今玉露凝陰金菊屆節白
雲明月彌望皆長沙秋色壯志非一日所能忘遙情越千里而若
結遂於杪秋晦日祖道啟行僦輶車南轅長征發夕始於汝灣厯
新息入羅山羅山迤南皆山高下相承亘綿不絕文若鏤錯碁置星
列迢遞崎嶇坳垤傾仄山下出泉水聲潺潺流入隙地灌溉利焉
林間茅屋微露數椽隔以澗谷障以雲煙於斯時也仰則觀山俯
則聽泉長吟柳州山水諸記詠歌之聲雜以車牽關關吹萬不同
而于喁相宣山行三百餘里煙霞之氣時時盈襟袖閒竟不知曲
徑馳驅之為艱也岡巒漸逸始就官道官道列鎮凡四曰三里曰

二郎曰少河曰大楊路盡石砌屋皆瓦甃列肆通衢商賈之所輻輳由是接迹於孝感黃陂以直達乎漢口漢口為梁南楚北要地界乎南紀若襟帶之有關紐漢之陽瀨江江與府皆以是得名府治居江之西其東則武昌省會之所設南北來極近於漢陽東西並列隱若敵國武昌漢陽之交門相望以江為市門之上曰蛇山在漢陽北者曰龜山兩山得名蓋以形似蛇山之首黃鶴樓建焉建於龜山者樓號晴川一望漢陽厯厯列於目前樓皆丹楹畫棟雕欄繡甍其聳翠高超連雲干霄下視盡四檝廣表之大要凡其中之繁華富庶皆可不勞而得諸登臨之瞻眺大江之濱時集行舟往者過來者留舳舻相屬盡不知其幾千萬艘江中小舟百餘出沒於波濤洶湧中如奔如馳自旦至暮供遊人役不以晷刻移吳兒解水未必能過於斯也鸚鵡洲在江南岸乃禰正平困黃祖

作賦處崔顥黃鶴詩所云芳草萋萋者情景俱見而顥之碑記在黃鵠磯仙棗亭西畔李太白欲和顥詩不能得甘以擱筆謝燦樓下有擱筆亭所以誌李白之謙非云玩也樓上像奉呂仙儒冠髦衣醉乘黃鶴玉笛橫吹人如玉鶴欲飛故其顏曰雲鶴歸事幻無據觀者雖甚流連徙倚終於俱歸而已遊龜山觀晴川樓門閉不得入然漢陽之樹俱在歷歷者可仰樓旁特建禹廟雲生虛壁江走白沙少陵詩至今始見其妙問諸土人曰此大別山也昔禹乘四載控三巴悉由此而達夫漢水歷三涇經大別載在禹貢土人猶能言之而世俗不察妄以龜蛇名山豈非得其形似而不究本原者乎更於山上建玄武廟以像龜蛇抑又鄙俚太甚真可痛嗟也已自是以後登舟江行江之闊約五六里方舟可濟出岷入海其長不可以道里計幸值風清氣恬中流揚帆極迅疾而無嫌俄

而變生激湍瞬息震掀驚濤濁浪白湧碧翻勢若天塹險如長垣
天限南北豈不信然江行五日泊牌州嘉魚京口茅鋪暨白鷺洲
而後至於岳州岳陽樓之大觀前人已備陳矣在宋滕子京修之
范希文為記寓意於先憂後樂志更超然絕倫余以遊盡天下之大
觀者謂或者不無是人也而樓毀碑頽求當年之遺迹無一存者
豈特巴陵之勝狀減色微斯入吾誰與歸能勿三復斯言哉從此
入湖口踰君山浩浩漫漫不見水端混太清而不分浮乾坤而未
安折吳會於東南思江界遺風而不勝詠歎宜楚士高者多蕭然
高寄忘人聞世泛汨羅拜三閭墓弔其孤忠終守常度而未替渡
沅湘謁相靈祠傷其幽怨特申旦旦之期誓女從男臣殉君道皆
終千古而不敵過此則直抵長沙矣長沙古黔中地為荆南八郡
之首其形勝則五嶺南指三湘北流其要害則交廣戶牖吳蜀咽

喉其土田沃且衍而家多饒裕其風俗醇以樸而習絕煩囂民以
網罟耒耜為業尚節義絀貨利厚重易治此其所以為名區也歟
其山岳之所毓精且美者為丹砂為水銀為竹箭為菁茅他若樹
木鱗葛魚貝蠶蛤又皆以備食用供征徭禦古迹之最著者夏后
氏之碑在焉賈太傅之廟在焉張魏公張敬夫之墓在焉選勝而
登宋之八景臺講藝而游岳麓山之書院又莫不虛往實歸尚友
古人於異代焉其他景物不能盡載余茲遊也於此可以得其大
概而不惟是也長沙地屬名區而又御以長材享以德惠其坐致
生理報政殿最仰副 聖天子簡畀至意一德咸有美斯交濟
後生末學奉嚴憚之心以考德問業求受其益不於斯有厚契哉
子長以善遊助胸中個儻非常之氣以成其文之博大古奧而必
曰側聞長者之遺風事未易為一二流俗人道然則余之繼斯遊

也亦豈徒於山川都邑民物風土之盛得其大較已乎志固有不
移者矣志且有所慕效者矣

馮氏
遺稿

山川不奇名山川乃奇名山川不能自奇得奇以遊之而名山
川乃奇顧人何能奇山川賴有文以奇之耳文何以奇山川賴
有奇字奇句奇氣以寫其奇而文奇而山川乃奇太史公足迹
遍天下而文有奇氣是文以山川奇也樸兄胸有奇氣過山川
觸之而出而山川益顯其奇是山川以文奇也有奇氣乃有奇
文有奇文乃有奇山川噫荆楚山川遊者何限必有斯記乃可
不負斯遊也已

韓桓遠
公氏跋

別墅銘

并序

王茂松邑人

別墅為張氏弟婦居婦十五于歸歸時翁姑俱逝弟相臨少婦一
歲零丁幼弱成立良艱賴婦經紀稍不凍餒婦持家有道十餘歲

世務井井若老嫗去年弟甫弱冠婦年二十有一矣弟以疾殞世遺婦一身然朝夕號涕中自有主同族親取予子為嗣曰三兄薄有名足以庇吾門戶且讀書明理教子必有法予素知其性剛烈寡言舉止不苟可望以柏舟節因感其言而諾之又銘其居以示箴銘曰

耿耿星河影烈烈日月光亘古無私照偏留貞女房貞女心皎皎相映光倍長正氣鍾高深不為俗緣侵雞鳴初寒夜息息見天心霜冷徹羅幃杜漸又防微偶出浣香紗猶懼起是乖拔舌抉目睛罵賊未絕聲古來貞烈女雖死今猶生聖賢皆可為惟在一點誠千金買寶刀持贈女英豪寶刀晶無玷女英勤自陶陶成千秋節隆名萬丈高北闕降恩綸南國旌真人節配乾坤老名隨草木新吁嗟乎青史留芳祠常春盡是當年孤寂身

序言張氏號泣中自有主同親族取己子為嗣又曰予素知其性烈寡言舉止不苟可望以柏舟節則張能全貞必矣故採之書高孝子割耳愈親事

張安雅 邑人

高孝子名大力余之東村貧道士也父早死無家以居母為道士奉母棲東村破廟中學束冥藟易粟以食不足使其妻乞食以給而身常不飽歲豐六年冬母病篤孝子朝夕服事不暇所業又歲凶妻乞食無所得自計不能謀醫藥誑妻出割左耳手熟以進病果瘳瘳後母怪其少一耳也詰之謬詞對終不令母知初余有事於潁北遇孝子舟中面瘠如腊髮蓬蓬若數月不櫛者攜壺與筐筐內紙十餘張香一瓣肉一醬意其出帛未之異也後每東西出數遇之攜如前而貌益羸視其肉乾如煤矣怪而問之泣然曰老母病久且殆醫藥不可得吾惟日禱於神而請以身代也今於四

村之叢祠社鬼既遍且數矣迄無靈吾將復禱於華陀之墓與槐店之三官廟者因哽咽蹲地悲不能止余時雖惻然心動然猶未遽以其言為信後半載聞其割耳愈母事始大嗟異親至東村之廟詢得其詳而記之

嗚呼自學校廢而先王教孝之道不講於天下於是天下之事親者偽則僅襲其文而真或竟入於野入於野者愛親之心具在襲其文斯愛親之心亡矣乃持毀傷滅性之論者不譏學士大夫之偽反責窮巷愚氓之真不知文者猶可勉為野者斷難假託今試導世之割股刲腸者使習學士之問安視膳吾知必油然色喜一習便能也導世之問安視膳者使效愚氓之割股刲腸將見變色卻步巧詞委謝矣已無愛親之誠而反詆能盡其誠者以自蓋是愚氓僅毀傷其形而學士實毀傷其性哀莫甚於心死然則所謂

滅性之罪反不在此而在彼持論者既昧於真偽輕重之辨又不追究所以失教之源而第執古經以責末流何其未之思耶

書張貞女事

張安雅

禮女未廟見而死歸葬於女氏之黨未婚夫死服斬衰於室既葬

而除守與不守皆無明文乃前代之議禮者遂謂守非經義不當

旌

元余忠宣
明顧士廉

嗚呼何其不求作經之微意也夫聖人豈不望盡人

之能守哉顧念中下多而上智少立經垂訓原為萬世人人法非第為一二上智設也果上智焉則義由心制經反可以不設矣聖人責人以恕不强人情所難能未嫁而守非智且賢不能也烏可以賢智僅能之事概律天下中下之人使強從哉即強從焉設遇孤貧無依之家而令愚弱幼女矢終身之志恐日久變生或有甚於不守者反不若除服之後聽其審處可通行而無弊也故第酌

乎人情之所能雖非其至而亦無甚害於義理意謂苟如是焉斯亦可矣如謂經未教人以守亦何嘗禁人以守吾知有聖人出固不强願嫁者而使之守尤必不强願守者而使之嫁也乃議者又謂不親迎廟見未成為婦何得私以身許人至謂等於私奔明歸論嗚呼父母之命媒妁之言自納采問名納吉納徵兩家父母又皆重之以龜著而聽命於其廟謂之私許可乎名義已定謂非夫婦可乎且斬衰服之極重無加者與既嫁之服無稍別也果不為婦即總麻已覺其贅安有在室之女無故而為異姓男子服斬衰者既已服成婦之服而謂未成婦可乎故聖人於是權衡乎情與理之間以為身雖未嫁而名分既定情義已屬與成婚者固無殊也故使與已嫁者同服然身終未嫁尚可從權又不能盡責人以守故與除服之下没其文而不復明言以使常人聽其改適賢者

聽其守志苟有大過人者自能進求其上以行乎義理之極致此固聖人始願之所期而不可必得者也是即與尋常夫死從子僅不再醮者一例同旌識者猶嫌其無差等而顧反以一旌疑之非特未求聖人之心抑且深背作經之旨矣書張貞女事

張貞女者河南祥符人幼讀書麤知禮義隨父耀堂縣丞候補於廣東有浙人馮鏜者固與張為世好亦攜家來官焉故張以貞女許字於鏜子祖培者祖培有伯母先死又數年其父母相繼死既除服婚有日矣祖培亦死同寄柩於佛寺張既與馮同官世好書牘問訊恆往來不絕女家奴婢無日不嘖嘖道馮郎者及祖培死女父母恐其知戒勿洩初貞女以知書故其父寓中不能延記室常命檢收書至是久不見馮氏有書至又家人寂寂無復有道馮郎者心竊疑私詰婢婢以他詞支益滋惶惑會假寐夢美少年冠

服入泣而謂己曰我汝夫馮某也已於某月日死矣四棺未葬目不瞑女一慟而醒醒而怒其婢曰馮郎死已久我盡知何尚誑我婢不能隱實告之乃跪請於父母願歸馮持服營葬父母詈之曰嘻嘻癡婢子馮氏已絕矣家四壁又無功期親若歸焉依女泣曰馮方依兒兒在馮雖絕未絕也兒不歸馮骨無歸魂無依未娶之鬼不得立後乃真絕矣且馮郎既要兒以夢望兒能承其事也姑從父母乞此身往了馮郎未了之事馮事了仍奉此身歸父母父母無過為兒憂憐而弗遣使不得報之於生前者必相殉於地下是愛兒反死兒也流涕叩首固請既而察父母終無遣己意遂於邑不食數日幾殆矣父母知其終不可奪而無如何也卒許之乃遍告張氏之戚與馮氏之族在廣者送之歸女素服登輿至則遍謁先代之主如廟見禮然後斬衰加經導詣寄柩所入寺號咷拜

奠先舅姑次伯姑次夫撫棺雀躍呼天者三投地哽咽聲嘶暈絕
弔客左右皆感慟泣下兩姓婦女扶掖勸慰者無不忍涕欷歔莫
能自持反失聲同哭而助之哀比議葬有馮戚里某者持歸葬甚
堅議久不決女乃使人謂之曰孀媳豈不欲撫柩歸塋里顧四柩
數千里費安出山川跋涉勞誰任必如阿戚言伶仃一弱女提空
囊何能辦阿戚誠念肺腑情能獨任思莫大孀婦當北面稽顙即
不能徒空言難成事事將終寢寢久暴露何若權厝於廣以俟異
日馮氏中有為吾夫後者之遷葬乎議遂定乃求夫之舅姚晉蕃
者為之經理主葬事方是時廣州士大夫與四方之宦游於廣者
聞之爭賻金買地而助之葬葬之日冠蓋鈿翹不期而會者數百
人耕夫蠶女老弱提攜來觀者成市焉會大雨傾注水淖沒髀貞
女扶曳號泣手挽四棺之緯一一下於窆揮涕稽首遍謝送客已

乃脫經易服復歸侍於父母之側安膳婉孌如平時家人咸慊之
既而理其卧具涕泗狼藉漬枕簟始知謬為言笑者外以慰父母
之心不敢極哀盡禮如居喪於夫家也

以壯得所
軒文集

練寨會小引

張瑞楨 邑人

今夫變化世風乃聖賢之苦衷而蕩平海宇實吾人之素志比年
以來中原多故寇盜如林老弱被其殺傷婦女任其淫污踐踏我
墳墓焚掠我莊村蹂躪我田禾戕賊我牲畜殘虐已極腥穢備至
苟非氣血兩亡安忍坐觀其凶惡苟能大眾一德何難殲厥夫渠
魁凡我與盟之人既盟之後悉如兄弟捐世習之小嫌仗宇宙之
大義或出財或出力或出車或出馬無事時務經百練或使智或
使愚或使詐或使貪行伍間不拘一格其有團牌精熟死生不懼
足以蔽賊之銳擊者列於陣之第一重其有鎗礮素優毒火素具

足以捍賊之遠交者列於陣之第二重其有勁弓利鏃神籠火箭
足以遏賊之徑進者列於陣之第三重其有長鎗闊斧百戰不怠
足以破賊之堅持者列於陣之第四重其有短兵利刃手快足捷
足以防賊之猝至者列於陣之第五重掌飲食者為一隊司芻茭
者為一隊運軍裝者為一隊守營巡者為一隊正兵五十層奇兵
三十層遊兵二十有四層行則馬居先而步居後戰則步為正而
馬為奇陣隊必須乎熟器械切忌其鈍多置謀士廣布腹心勿以
偶得偶失定成敗勿以半信半疑待英豪集思廣益不可以剛愎
之見廢羣策謀定後動不可於狐疑之時決勝負臨大敵而氣定
神閒常若據我不可犯之勢救重圍而星赴電至要深體彼不及
待之心至若所到之處務獲安集鄉社之約亦須有禁奸人妻女
者殺焚人廬舍者殺鼓之不進金之不退不遵主將之約束者殺

探報不實妖言惑衆阻撓士卒之鬪志者殺機謀未發三兩竊議使敵人預知我之所向者殺坑戮降卒欺罔鄉愚致脅從盡絕投誠之路者殺凡此數條行軍至要見可而進知難而退則又存乎其人矣在愚等忝列會末敢遽忘芻蕘之獻諸君子智慮深沈應不吝旌旗之麾掃蕩擴清令狂瞽知有天日勞來匡直俾我皇重奠山河上以永國家之運下以造黎元之福夫而後荷戈者歸諸農運籌者置諸學典禮正樂奏和親康樂之書釣水遊山償林泉退居之願老安少懷各得其所則豈惟愚等與諸君子之幸而亦天下之幸也是為引

修竹齋文集

書劉節婦事

楊凌霄 邑人

婦人而以節著不幸也乃有極守節之苦而志不伸於人名不立於世尤不幸中之不幸也如吾邑劉節婦是已節婦姓李氏余比

鄰李普春女性溫淑年十八于歸為劉安妻三載夫亡無子女其母
憐女少且以劉極貧無養欲奪其志婦不可即撫夫姪為嗣以回母
心衣食皆取給於織紡舅姑之前未嘗少有怠志每歸省時常至
吾家吾母以大義勸勉之婦志益堅妯娌中有夫亡欲嫁者婦輒
苦口力爭卒賴以守嘗謂弟閣曰此婦苦節他日表揚吾輩責
也不意婦於光緒八年十月間染疾費志以歿計守節僅五年

例難請

旌嗚呼守節而至死婦之幸也死而不得以節著婦

之不幸也愚欲以婦之幸表婦之不幸雖言之無文亦不得辭其
責也遂據實書之質諸世之取善君子焉抑又思之天地正氣未
嘗或息於人心而尤多於婦人女子發之彼窮鄉僻壤間完節以
歿湮沒不彰者不知凡幾其不幸中之不幸有誰知哉留心風化
者願可易而忽之乎

連齋
文草

烈女紀聞

楊凌閣 邑人

烈女姓氏不詳繫北方流民女光緒丁丑歲饑項北火星閣田某以粟易之約十歲撫若己出女亦父母之田嘗曰長為汝擇家女唯命繼欲以女為姪婦女亦唯命漸長有色且賢田愛之使妻通言欲納為妾女不從屢言之女誓死不從甲申夏女往田收洋煙暗納一塊於衣帶間人無知也日閒仍殫勞動事惟命是趨冀有以回田之心而田逼愈迫女知其不可轉計無以自全遂飲洋煙死時乙酉夏五月也田悔且懼匿其情節以他故鄰里知之者皆隱為女寃而切齒不平友人鄧文垣道烈女事甚悉予聞而歎曰烈烈乎何從容就義如是乎彼女子數歲鬻人何嘗聞人講禮教談節義乃遭此萬難自全之事威逼計誘而終不變且遲之以時而俟其轉不輕死也窘之以變而殉其身不苟生也暗藏毒煙於

身志豫定也絕口不言於人不求知也仁至義盡求之古今貞烈中國不可概見即文人學士素以禮教節義自矜一旦臨變或濡忍一死或激切一死視此女從容以死不萬萬不及遠甚乎惜乎姓字不傳祖籍莫考又無名公鉅筆為之立傳使言可徵信文足行遠致烈女湮沒不彰為可憾耳余故記之以見天理不絕於人心世之觀者或有激於斯言

李忠奎姬成功救項殉難記

按採訪冊姬或云吉

楊凌閣

李忠奎性勇敢不詳其籍從張公耀屢立戰功同治二年汝匪吳萃亭李如淞等盤踞項北尚店寨張公奉檄討賊環攻之數月不下用地雷烘塌寨牆數丈忠奎恃勇先登中礮洞胸死越日寨破旗弁剗逆匪趙鳳岡心以祭哭聲達數里邑人赴弔者皆流涕姬成功者籍亦失考並不知所帶何營同治初年汝匪蜂起項南各

寨為賊脅勢岌岌成功時駐節汝甯項紳潛往請救即率兵五百抵項屢戰皆捷賊憚之一日賊率大股圍馬寨及曹窰寨成功馳救戰移時賊退走時當六月秫林遮目成功率數騎尾追後兵不繼賊伏突起秫林中成功奮勇與戰眾寡不敵竟遇害取首去兵至僅得下體殮櫬致祭弔哭者如喪私親迄今城南各村感其德者猶家祀尸祝不能忘云同時死者有曹廷棟張應考趙玉振

書李孝子事

楊浚閣

孝子李班鄭郭集人父應化中年沒母唐氏生三子班其次也以貧故兄弟皆未授室傭於外母善病班獨戀戀不忍去晝夜依母呼必應母患足痛如割浴稍止班為手洗日數次便溺提抱之未嘗幾微厭煩母時愁悶班即為唱曲以博其歡得飲食供母亦高歌野曲以侑之或往田採薪拾穗則奉母坐小車推之暑日張蓋

其上冬則背負以就暄鄉間賽會必奉母往觀十數年不稍懈也
母以壽終而班已五十矣遠近知之者皆稱為孝子而不名噫世
人富於班者多矣求能旨甘奉親不作忤逆態者已鮮况如班之
養志乎即求之古人殆江革蔡順之流亞歟而班獨不學能之則
更異矣視彼文人學士飾言祿養舍親遠遊乃祿未得而親已沒
矣聞孝子之行其亦知愧乎且孝子微者也而其行可風恐其久
而就湮也故書之

漂白阮記

余連軫邑人

漂白阮者誌孝女也在邑東三十里駱莊東華陀廟前不知昉自
何代父老傳言古有貧女母病豫蓄白布為孝巾用旋因衣破待
補甫染就而母卒女哭濯於此布為復白鄉人異之故曰漂白也
嗟乎女貧極矣平日母女相依淒風苦雨中不知下幾許血淚况

母病呻吟具飲饌供湯藥出入一身艱苦萬狀當日何人過而問
焉獨於其漂白事異而傳之女之姓氏並無傳焉然事傳則女傳
孝亦傳矣因援筆為之記

以上採
訪稿

祭文

祭禹州訓導三叔父文

袁保恆 邑人

維同治九年庚午六月丙申朔越十八日癸丑姪男保恆於西安軍募聞 皇清誥授中憲大夫晉贈資政大夫四品銜在任候選同知禹州訓導三叔父之喪謹設位於多公祠之西偏以剛鬣柔毛清酌庶饘之儀泣奠於叔父之靈曰嗚呼天乎叔父竟舍保恆而長逝耶自去歲冬聞叔父患肝胃痛率及脇背竊以氣血不和劑以調養氣血之藥當即安耶未幾得叔父手諭云不過獨坐微覺煩滿而於坐臥行走無妨也飲食譚譚無礙也保恆曾謂叔父年逾六旬不宜服峻利藥求速效惟於飲食加意調攝當日平復孰知竟因此不起耶前十日內曾得叔父兩次手書殷懇周摯字路不殊精神不亂竊幸頤養日益康健矣詎料數日閒而凶聞

忽至耶去歲夏秋間叔父曾諭以數年未見欲西來看視保恆保
恆以叔父高年不耐山路崎嶇之苦極力勸止竊謂一旦軍務平
定當乞假東還常隨杖履承祖母之歡豈知叔父竟不待耶今年
三月聞叔父東歸省覲祖母親承色笑依戀久之因考試期逼促
令返署送考詎意此行竟與祖母永訣耶禹之視項在直西聞叔
父遺命殮後停柩必東其首嗚呼孺慕誠矣遺憾深矣尤堪感痛
咽鳴者也又聞叔父遺命諄誠無令祖母知之嗚呼以高堂垂百
之年誠不可聞此凶耗保恆之遭父喪也多方隱諱於祖母之前
飲痛至今不謂又遭叔父大故也其果可支飾耶抑不可支飾耶
惟叔父之靈默相之間四十年前祖母抱病吾父與伯父叔父相
率瀝血禱於竈神共捐壽以益母其果上動天鑒耶何以均不臻
上壽耶然則祖母之壽更將無算叔父靈爽其相與護持之知及

身之事奉有窮而神明之誠孝無盡也此尤可哀痛者也我父同胞四人惟叔父得子最遲保頤弟今甫十四齡耳叔父未及親見其成立保恆等當仰承叔父未盡之心竭力教之俾繼先志而慰親心亦惟叔父之靈有以佑啟之嗚呼叔姪一也惟保恆蒙叔父愛養最深憶保恆自十歲遭母喪我父供職儀曹不能歸里叔父提抱保恆及兩妹扶母柩歸葬辛勤倍至三十餘年間兩妹相繼殂謝今叔父又長往矣惟恆獨覲顏人世其痛為何如也况羈於軍旅制於功令不得一請假盡哀柩前率保頤奉喪東歸其上負叔父下負私心為何如耶前月叔父曾以年命囑請日者推測日者之言謂流年旺相當有極品之榮保恆知叔父歸養之志早決竊思今日去官則明日為叔父請極品封以盡區區仰報之私耳嗚呼孰料遲速參差聞而叔父不復待耶叔父司鐸禹州近三十

年禹之人士感德受恩親若家人父子軍興以來聯鄉團固守禦捍大禍保危城厥功偉矣遺愛深矣知禹之人必有尸祝而社稷叔父者可謂不負平生矣惟以叔父之才之德若早膺民社必有特出流俗者樹立當不止此記吾父於二十年前謂叔父無作牧令蓋學官不出本省便於迎養也以故叔父以勳勞資望屢膺卓薦叔父仰體吾父之志均辭不就吾父奉命治兵於外鄉關多故吾母奉祖母就養禹州者垂二十年姪保齡亦得承訓教以成以立乃豫亂既平祖母歸里叔父決計乞養而天不假年矣嗚呼痛哉保恆已為鮮民矣欲得長侍叔父上壽有所稟承下以盡其孝思而今已矣其尤鮮民中熒熒者乎叔父何竟舍保恆而長逝耶天乎神靈不昧其來格來歆乎嗚呼哀哉尚饗

祭余孚山先生文

楊凌閣 邑人

歲維庚寅十一月朔越十有八日邑後學楊浚閣謹以香酒果品設位遙祭為辭以達孚山先生之靈曰嗚呼哀哉鄉邦典型竟從此墮地耶丙戌之歲天既奪吾柳圃今又降割於先生吾道之窮竟至是耶吾鄉自黃載公先生以夏峯高弟開一方正學之先樊聖傳先生以名進士家居講學於其繼今數十年於茲慨斯道之久墜幸先生之崛起謂前賢之可嗣而識之高不狃於詞章記誦之末學之正不惑於象山姚江之異常謂小學近思錄為入聖之階梯愚嘗於請見之餘曾諄諄而致其誨使先生而得竟其修其造詣之卓又烏量其所至至其心之熱期有濟於斯世斯民譽之硬實能敢於不趨不避雖身未居言官而於時政之缺失猶必委曲以陳其義讀先生垂沒之遺稿猶覺滿紙皆熱血灑成懍懍然有生氣聞先生臨終大呼曰吾之事業竟止此乎亦可謂一腔忠

愛徒使英雄滿襟血淚而已若乃孝友絕人而勉勉如不及直諒
有餘而謙謙常自退厚於人而不計己之貧和於衆而不矜己之
介愚猶恐其過寬曾以温不增華寒不改葉舉古人名言以為戒
諒先生必不至此而區區之私謹以是為獻芹之愛蓋其德量寬洪
器識廓大雖侃侃而有為實汪汪而無際亦其深涵濡於先德爛
爛天真復取資於師友裁成大器至數十年優游厭飫於諸儒遺
書中者尤所謂取之博而擇之粹宜其講學於家而化洽同人進
位於朝而德孚僚誼望他時功成歸休著書垂世不惟為吾黨
之師程抑又為後起之仰賴何此望之徒殷竟感疾而長逝失有
邦之柱石壞吾道之帶礪嗚呼哀哉閣實無狀辱蒙不棄情義諄
懇勸勉備至感先人之相知曾哀懇以作誌極下筆之審慎數擬
稿而終不愜意謂時日之甚長矢勉力以從事奄一夕而告終竟

所求之不遂痛先德之就湮欲表揚其何自恨小子之無良抱遺憾而隕涕嗚呼先生以強仕之身而遽至是耶以吾道之重而竟至是耶茲因葬期之阻雨未得匍匐以趨會謹為位以泄哀復陳詞以奠祭想存亡之一理尤望先生陰有以牖吾之衷而輔吾之志嗚呼哀哉尚饗

祭夏默齋先生文

楊凌閣

維辛卯十月朔有九日後學楊凌閣謹以隻雞斗酒致祭於例授文林郎默齋先生之靈曰嗚呼天道可測而不可測人道可憑而不可憑以先生之盛德謂上壽之可登年方艾而服官胡一疾而莫興抱滿腹之經濟竟不獲少展其才能勵矯矯之峻節樹傲骨兮峻嶒厯艱苦而不變任茹蘖與飲冰極料事之卓識直透曲折於數層常與古而暗合言有中而不矜擔荷勇則重遠不避動

忍至則智能益增洵足察人所不及察勝人所不能勝雖有時似嫌於激烈要無非發於至性之不容已而皆為真氣之所凝其學品方諸古而不愧求之今則得有未曾固宜聞訃而遠近莫不傷悼况閣受知獨深蒙愛獨厚能不失聲驚號悲慟而填膺嗚呼鄉邦典型棣翁默翁乃棣翁甫逝而默翁又終固命之不淑何吾道之終窮後進將誰為之誨前修將誰為之崇異端將誰為之闢正學將誰為之宗即如閣之愚昧迷將誰為之指過又將誰為之攻耶憶昔壬午之歲曾杖履以追從閣甘執後進之禮而先生高忘年之風析理則細益求細論文則工益求工既恨相契之晚共喜所見之同謂閣於禪學尚未拋盡一言而啟我瞶聾且謂於人多計較之私何器量之不宏使我得見天之廣大無非先生誘掖啟迪之功極感德之靡已粵惟乙酉仲冬適先嚴六秩誕辰徵頌詞

於諸公先生乃隨筆以誌意洵情厚而誼隆深勉我以善養謂進學即在不顯之中前途方共期遠大不料所言之皆空嗚呼已矣徒令我念舊德而慟徹心胸於惟先生孝先百行繫丙戌之春闈遵慈命以入京胡壯志之不遂命不可以力爭痛慈幃之棄養竟遺憾於生平極哀慟之迫切拚九死而一生急匍匐而來救共號哭而失聲謂惟仲唐知我與蒼蒼者共鑒此情深罪悔以廬墓備怨慕之真誠誓從此而絕意仕進見前日之本為親榮乃先生方抱失恃之痛閣亦旋為外艱之丁恨予孽之深重致吾親弗享遐齡恐先德之就湮懇先生錫以誄銘謂己身方煢煢在疚此責不敢遽承及服闋而入挑慶登庸於闕廷將一行而作吏洵一路之福星旋截留以三載俾翹車以暫停方私心之竊喜幸教誨之得聆如何泰山忽焉其傾失有邦之循良喪吾輩之典型不復得

步趨以追隨不復得從容以執經以盛德而不遭隆遇徒致慨於天道無靈望先生於九原遇我先人謂閣兄弟仍守遺訓於趨庭道不外謹身節用學惟遵濂洛考亭想先生之愛我必無替於幽冥願陰為之啟牖俾此念之常惺謹具奠以洩哀庶俯鑒此微馨

祭楊伯漢文

孫舉海 淮甯

嗚呼哀哉天之割我同人何其酷烈如是耶前者默齋棗堂次榘年未六十既相繼彫謝今者伯漢乃年未五十胡為竟亦溘逝耶世道將誰為之持正學將誰為之衛耶前賢將誰為之彰後生將誰為之誨耶五倫將誰為之振興四禮將誰為之維繫耶若我之愚過將誰為之攻而邪將誰為之閉耶然則伯漢之亡胡不使我聞訃而失聲呼天而隕涕耶嗚呼伯漢有特達之識而猶自以為淺有包容之度而猶自以為褊有敦篤之情而常覺所施之未至

有廣大之志而常覺所到之未遠蓋所學恪守程朱懍遵薛胡近則甚愛桐鄉深慕平湖以此為坦平之路正大之途若夫事親生則養其志而顯其名歿則盡其禮而竭其誠處弟則不獨如姜氏之被田氏之荆而且志同道合直欲追蹤兩程至於事師則事之猶父心喪三年夫後世視師如路人多矣而伯漢獨效夫曾顏授徒則誨人不倦課行為先夫當世教以取科第而已而伯漢獨期以聖賢至於交友善則相勸過則相規喜聞直諒之語切戒掩飾之辭兄弟既怡怡而切偲朋友乃切偲而怡怡尤能容我骨鯁契我迂癡話連牀而送握手敬愛直若無以逾之孰料客秋同母而抱病旋因痛母而幾死雖云疾之所致亦由過於哀毀今歲我乃從師梁苑肄業伯漢偕弟廬墓讀禮臨行造謁於廬中猶把臂遠送於潁水後聞有疾而心驚旋聞遂愈而色喜及接仲唐之手書

竟謂一病而不起使我悲傷之填胸不覺涕零之莫止轉恨彼蒼之不佑斯文豈獨慟我之喪一知己謹來致奠以洩哀忍辭遠於三百餘里嗚呼伯漢曾居廬之未終而竟至此耶良朋歎斯道之益孤而仲唐不尤孑然無倚耶噫是果誰為之使耶天乎天乎已矣已矣

以上採訪稿

項城縣志卷二十一

麗藻志十

賦

靈河賦

魏應 瑒 邑人

咨靈川之遐源兮於崑崙之神邱凌增城之陰隅兮賴后土之潛
流衝積石之重險兮披山麓之隘浮颶龍黃而南邁兮紆鴻體而
因流涉津洛之阪泉兮播九道乎中州汾鴻湧而騰驚兮恆臺臺
而徂征肇乘高而迅逝兮陽侯怖而震驚有漢中葉兮金隄潰而
匏子傾興萬乘而親務兮董羣后而來營下淇園之丰籜兮投璧
玉而沈星若夫長杉崩檣茂枯芬檀扶疏灌列映水蔭防隆條動
而暢清風白日顯而曜殊光

懸驥賦

應 瑒

慙良驥之不過兮何屯否之弘多抱天飛之神號兮悲當世之莫
知赴元谷之漸塗兮陟高岡之峻崖懼僕夫之嚴策兮載悚慄而
奔馳懷殊姿而因還兮願遠迹而自舒思奮行而驥首兮叩繯綵
之紛拏牽繁轡而增制兮心惱結而槃紆涉媛遠而方舉兮迫輿
僕之戎拘抱精誠而不暢兮鬱神足而不據思節翁於西土兮望
伯氏於東隅願浮軒於千里兮曜華軌乎天衢瞻前軌而促節兮
顧後乘而踟躕展心力於知己兮甘邁遠而亡劬哀二詰之殊世
兮時不邁乎良造制御轡於常御兮安獲騁於遐道

北魏袁

翻邑人

以上漢魏百
三名家集

思歸賦

日色黯兮高山之岑月逢霞而未皎霞值月而成陰望他鄉之阡
陌非舊國之池林山有木而蔽月川無梁而復深悵浮雲之弗限
何此恨之難禁於是雜石為峯諸煙共色秀出無窮煙起不極錯

翻花而似繡網遊絲其如織蝶兩戲以相進燕雙飛而鼓翼怒驅
馬之悠悠歎征夫之未息爾乃臨峻壑坐層阿北眺羊腸詰屈南
望龍門嵯峨疊千重以聳翠橫萬里而揚波遠揮鱗與麇麋走鯉
鱉及龜鼉彼暖然兮羣浴此邈矣兮關河心鬱鬱兮徒傷思搖搖
兮空滿思故人兮不見神翻覆兮魂斷斷魂兮如亂憂來兮不散
俯鏡兮白水水流兮漫漫異色兮縱橫奇光兮爛爛下對兮碧沙
上覩兮青岸岸上兮氤氳駸霞兮絳氛風搖枝而為弄日照水以
成文行復行兮川之畔望復望兮望夫君君之門兮九重門余之
削兮千里分願一見兮導我意我不見兮君不聞魄惘恍兮知何
語氣繚戾兮獨縈緼彼烏馬之無知尚有情於南北雖吾人之固
鄙豈忘懷於上國去上國之美人對下邦之鬼域形既同於魍魎
心匪殊於發賊欲修之而難化何不殘之云尅知進退之非可徒

終朝以默默願生還於洛濱荷天地之厚德

魏書本傳

遊蓮池賦

明史按朱

欽 師武

成化改元丁亥之歲奉勅渡河考較殿最遂與二三同侶越大梁
濟雙溝望南頓踰宛邱適金氣之方應而大火之西流乃泛蓮池
以入項目蕩漾乘扁舟渺予望兮百里同錦錯而雲稠其水鳥則
有鴻鵠洶河鳧雁駕鵝屬玉鷓鴣鴛鴦錦鮫其植物則有葭莢江
蘼蘆黃綠莎蕙芷蘭蓀蘋蘩芰荷較其色香之尤美則又莫若蓮
之為獨多也觀夫亭亭淨植紅香滿湖或傾如醉或倚如扶或倒
影如自照或隔葉如相呼長如美婦低若女奴至於風折沈波翻
紅蕩綠彷彿玉環華清初浴半含半笑旖旎生香有若宓妃凌波
欲翔煙昏露溼相偎如泣有若皇英望嶷愁立風搖素質嫋嫋婷
婷有若嫦娥舞於廣庭枯蒲橫映折葦斜隔有若鄰姬偷光夜績

其為狀也萬變不一至若菱蒲菰米荇蓼游龍或組絲而蔓綠或
婉孌而酣紅閒參差於荷芰咸欲窺映於孤蓬於是乃邀同遊諸
子放歌中流卧而復興摘蓮芳擷水菱狎鷗鷺呼魚罾酬光武於
荒祠稽瞻星於子陵顧謂客曰子亦知此之有足徵者乎方其戰
昆陽破尋邑當戎馬之交馳適雷雨之霽雲是以嚴生不能為之
謀而虎豹亦股栗而辟易俾赤帝之中興而干戈之載戢也而今
竟何如哉今吾與子幸際太平羣英滿朝臣皆稷契君同禹堯時
方無事足以逍遙樂鳶魚之一天又何以閒於漁樵客起讓予曰
吾聞出處不同仕隱兩途若舟之不可以陸通而車之不足以泛
湖彼漁樵之所樂又豈吾子章縫者之足知乎噫人亦有言小隱
山林大隱朝市蓋其心苟靜矣雖處朝市而何以異於山林苟為
不然將日憧憧而不已我非漁樵惟其所樂殆無不同子既非我

又安知予之不知彼三問不對客笑而起予乃命酒折荷為碧筒之杯載歌而飲客曰荷之中通兮清以香予飲勿疑兮終吾生以徜徉又歌曰荷之華吾可以為鏡荷之實吾可以為飮予飲勿辭兮聊逍遙以容與於是賓倡主酬銜杯抵掌揚桂柁擊蘭槳蕩紅葩凌沆漭相與暢懷而忘倦不知扁舟之達項

瑞蓮賦

馬斯和邑人

萬厯二十四年歲在丙申百嘉鬯萬彙豐玉燭調太和鍾項城之隍有芙蕖焉下沃其根上茂其華皜皜焉一莖雙芳委委焉麗藻而葩池沼之吏覩而倏驚呵護既謹走報宰公宰公泰和王父師欽誥也志潔行芳德粹而光濯漣漪而無染騰官圃之芬芳慊茂對於天地萃樂意於一腔爰命賦之欲辭未遑援筆而賦曰伊歲運於柔兆兮適會合於涪灘正祝融之司令兮而朱明之當權草

木紛錯蔥蔥芊芊拖綠者錦舒載紫者炎燃而英而秀以朱以元
咸崢嶸於麗景而爛熳於鈞天質各有定理不相參受多者不能
呈寡單並者不能雙妍求孕靈而鬪異索萬類而皆難嘻茲蓮兮
乃獨不然匪嬌以冶匪濃以豔匪夭夭如桃華憑水漂零匪汎汎
如遊萍從風聚散潛螢兮匿膩粉之腕舒蓮兮開碧雲之扇香飄
馮彝之宮影破魚龍之戰參差浮沈飄颻凌亂惟禎祥駢集而來
故華華並蒂而見彷彿鴛鴦之簪依稀英皇之面倚翠蓋兮逐隊
而立臨清流兮並肩而玩公曰美哉蓮之形而非蓮之情乃更厥
辭曰何雌何雄一氣而生匪西匪東聯類披榮含蕊兮玉女相對
而啟容散萼兮素娥相笑而無聲相攜兮若倡和之無異願相戀
兮若山海之有同盟宛秦晉兮相匹豈燕越兮相傾此爾我之乍
分持在芥蒂而膠漆之莫辭乃其衷情公曰美哉蓮之情而非蓮

之景乃更厥辭曰方其曦馭曠曠旭光乍現未燭徹於八極先馳
飛乎匹練如一體乎傾城宛同心兮出盥乃若葉舞輕颺影搖圓
鑑躍雙鶴於瑤池映新妝兮玉案又如曉露方稀夕霞在澗恍真
妃蘭浴而鳳墜嬉嬉恍僊子霓裳而鸞行嫵嫵洩清泉兮銀索破
瀉細雨兮瓊珠濺又有菰蒲依倚藻蘋緒斷鷗鷺鳧鶩鯨魴鮪鱈
參錯往來悠悠衍衍彼無情者尚對時以嬉則觀物者甯不觸景
而羨公曰美哉蓮之景而非蓮之德乃更厥辭曰出泥不污中通
外直不支不蔓亭亭淨植的皪清標君子之質孔子有云二人同
心其利斷金在野同道在國同寅彼皋夔與兩魏信萬載之徽音
覩芳蓮之並蒂又何異乎吉人公曰美哉蓮之德而非蓮之瑞乃
更厥辭曰蓮者連也蓮而雙華是連連也厥瑞在官連連以陞如
華華之盛兮而並躋公卿厥瑞在士連連以登如華華之盛兮而

聯捷同鳴厥瑞在歲連連以豐水不揚波日不乾封如華華之盛
兮而岐秀疊呈厥瑞在民連連以甯疫癘不作鉦鼓不鳴如華華
之盛兮而偕樂昇平公曰瑞在民物厥有主者乃更厥辭曰否終
則傾泰運斯昌造化既返和氣致祥靈呈水卉福在皇主兆光華
之四訖定奕葉之輝煌公曰瑞哉瑞哉蔑以加矣曰未既也一蒂
而合象太極也雙華而秀象兩儀也累累蜂房中吐衆子象萬物
也物本於儀儀本於極極本無極天地不知氣至而化莫為而為
匪人道之感格疇默露而潛移故君子不敢竇虛禱以求應而惟
修實德以為奇然後造化在我福履永隨公懼然曰旨哉言乎決
天於人可鑄諸石命工書之永以為識時有香颺北來脈脈不息

神著賦

訓導 楊維學 湯溪

余當課士之有暇懼負聖君而無補方思操觚以頌德適有客過

余而談今古談及項邑之嘉祥後先輝映而接武相彼菑葛既並
頭而吐芳載觀神著復藜生而媚嫵於是瞿然驚灑然異欣然而
問曰凡盛之盛者難乎其為繼何上瑞之駢臻豈感通之有自余
曰客不聞乎世運之理有開必先化行下土道格重元天人協應
理固有然粵稽遠古具在簡編包犧德合上下兮天地應而河圖
呈軒轅厯調四時兮神策獲而屈軼生三辰定而七政齊兮朱草
莫莢降於庭南風薰而民溫解兮景星出而卿雲興况復洛書獻
鳳凰鳴白魚躍河流澄何莫非綦隆之象上理之徵是惟聖人道
超無始德及太清調四時之玉燭致六符之清甯以故太和融掖
協氣薰蒸萬彙熙恬羣品化成匪直凡卉欣欣向榮且彼靈著蔚
蔚斯生奇哉著兮總一本而分百莖可以彰萬幾之理一統之盛
異哉著兮象鳳尾而肖龍頭可以表鳳儀之美龍德之馨靈哉著

兮折清亂而定猶豫可以助乾剛之斷離照之神之瑞也真與龍
馬諸祥而媿休冀英衆美而相濟者也客曰聖人在上德及幽遠
天不愛道地不愛寶則吾既得聞命矣然聖化所敷豈不邇乎南
暨乎北被乎西漸乎東何不彼之產而產乎中土之中余曰客亦
知夫中土之美乎夫中土陰陽之所交也風雨之所會也嵩嶽之
所峙也滙澗之所流也且其分域也左跨徐揚右連秦晉燕趙其
屏楚蜀其襟豈非六合之上游而寰宇之腹心也故宇宙之貞元
乾坤之淑氣雖流貫乎八埏而尤於中土乎萃聚矧官茲土者類
握瑜而懷瑾悉高賢而大良或於蒼赤乎撫綏或於清濁乎激揚
或藩宣而屏翰或持憲而肅綱或建隼旟而承流千里或擁熊軾
而施惠一方疇非所以導羣生官陰陽佐邳隆迓禧祥著固神物
也不產乎中土之中而產乎何方客曰是固然矣中土不獨一項

也項且叢爾也何瑞蓮先之神著繼之也余曰容是之疑豈未知
王公之宰項乎公以西昌之人豪寄百里之專城應上天之郎宿
乃有脚之陽春觀其治項也躬德化而易風俗灑澆漓而還醅樸
節無用而去浮費省訟謀而黜煩苛抑蠹政而勵豪強安良善而
扶老弱煮粟糜以活饑民先撫字而後催科葺費舍以育人材追
棧樸而繼菁莪修誌謀以備觀省通文運而疏虹河不一年而廢
修墜舉甫二載而政通人和抑且清操勵己湛湛乎冰壺秋月抑
且持正守法凜凜乎玉折竹裂抑且至誠御物肫肫乎秉心如結
嘉德美政煌煌赫赫幾幾微才未能殫說項之民也際斯時也熙
熙乎如登老氏之臺遊建德之園則彼著之生雖上之所致哉要
亦我公釀之也客曰君聖臣良和氣致祥士民其安邦家其昌自
今伊始萬世無疆曷其識之以永不忘余既心切頌德頓忘不佞

敬擬所談泚筆而書之以彰其盛

以上舊志

詩

侍五官中郎將建章臺集詩

魏應 瑒 邑人

朝雁鳴雲中音響一何哀問子游何鄉戢翼正徘徊言我塞門來
將就衡陽樓往春翔北土今冬客南淮遠行蒙霜雪毛羽日摧頽
常恐傷肌骨身隕沈黃泥簡珠墮沙石何能中自諧欲因雲雨會
擢翼陵高梯良遇不可值伸眉路何階公子敬愛客樂飲不知疲
和顏既以暢乃肯顧細微贈詩見存慰小子非所宜為且極歡情
不醉其無歸凡百敬爾位以副飢渴懷

昭明文選

報趙淑麗

應 瑒

朝雲不歸夕結成陰離羣猶宿永思長吟有鳥孤棲哀鳴北林嗟
我懷矣感物傷心

公謙

應 瑒

巍巍主人德佳會被四方開館延羣士置酒於斯堂辨論釋鬱結
援筆興文章穆穆衆君子好合同安康促座舉重帷傳滿騰羽觴
百一詩四首

應 瑒 邑人

下流不可處君子慎厥初名高不虛著易用受侵誣前者隳官去
有人適我閭田家無所有酌醴焚枯魚問我何功德三入承明廬
所占於此土是謂仁智居文章不經國筐篋無尺書用等稱才學
往往見歎譽避席跪自陳賤子實空虛宋人過周客慚愧靡所如
年命在桑榆東岳與我期長短有常會遲速不得辭牛酒多為樂
無為待來茲

室廣致疑陰臺高來積陽奈何素世人侈靡在宮牆飾巧無窮極
土木被朱光徵求傾四海雅意猶未康

子弟可不慎慎在選師友師友必長德中才可進誘 闕

稊詩三首

細微可不慎隄潰自蟻穴勝理早從事安復勞鐵石哲人覩未形
愚夫闇明白曲突不見賓焦爛為上客思願奉良規江海倘不逆
狂言猶寡善猶有如雞跖雞跖食不已齊王為肥澤 穴一作巢
跖一作脇

散騎常師友朝夕進規獻侍中主喉舌萬機無不亂尚書統庶事
官人乘法憲彤管弭納言貂璫表武弁出入承明廬車服一何煥
三寸齊縈秩百僚所瞻願

少壯面目澤長老顏色麤麤醜人所惡拔白自洗蘇 闕

三叟

應 璩

古有行道人陌上見三叟年各百餘歲相與鋤耒耨住車問三叟
何以得此壽上叟前致詞內中媪貌醜中叟前致詞量腹節所受

下叟前致詞夜卧不覆首要哉三叟言所以能長久

百上十首漢魏
百三名家集

華林園宴射詩

晉應
貞邑人

悠悠太上人之厥初皇極肇建彝倫攸敷五德更運應籙受符陶
唐既謝天厯在虞於時上帝乃顧惟眷光我晉祚應期納禪位以
龍飛文以豹變元澤滂流仁風潛扇區內宅心方隅迴面天垂其
象地耀其文鳳鳴朝陽龍翔景雲嘉禾重穎蓂莢載芬率土咸甯
人胥悅欣恢恢皇度穆穆聖容言思其允貌思其恭在視思明在
聽思聰登庸以德明試以功其恭惟何昧且丕顯無義不經無理
不踐行舍其華言去其辯游心至虛同規易簡六府孔修九有來
賡澤罔不被化莫不加聲教南暨西漸流沙幽人肆險遠圖忘遐
越裳重譯充物皇家峩峩列辟赫赫武臣內和五品外威四賓順
時貢職入覲天人備言錫命羽蓋朱輪貽宴好會不常厥數神心

所授不言而喻於時肆射弓矢斯具發彼五的有酒斯厭文武之道厥猷未墜在昔先王射御茲器示武懼荒過則有失凡厥羣后無懈於位

昭明文選

楊烈婦

唐李翱

唐皇失馭強臣策海內蒼生苦鋒鏑蔡州逆賊勢猖獗掠地屠城無與敵狼奔虎跳臨項城項城縣令心膽驚眼前士卒能有幾孤城難守思逃生私將此計語諸婦烈婦諫夫勿內顧人臣死為國家計况有丁男可招募城中得士數百人人慕義思奮身烈婦周旋給軍餉躬親執爨同艱辛夫君倉卒中流矢劇甚歸家顧妻子勸君強出安人心戰死勝如牀下死登城督戰衆志堅如神有助非偶然一箭射中賊鳥將賊衆引去城完全夫得輸忠盡臣職大義昭彰婦德奸雄轉盼委塵土烈婦至今猶廟食

李文公集

大吉寺

唐温庭筠

井州祈人

石路無塵竹徑開
昔年曾伴戴顓來
窗間半偈聞僧鼓
松下殘碁送客回
簾內玉峯藏夜雪
砌因藍水長秋苔
白蓮社裏如相問
為說遊人是姓雷

温飛卿集

項城道中

宋張耒

淮陰

塵壁蒼茫有舊題
十年重見一傷悲
野僧欲與論前事
自說年多不復知

宛邱集

柳鎮春翠

戴昫

誰開臨水市
青青柳半遮
翠枝拂歌岸
樾影印平沙
長隄聞鶯語
曲灣隱釣艇
春遊渾未厭
爭似河陽花

澗水環流

明知王璟

廣安

潁川環一帶
茲水更澄清
月照波光漾
風吹樹影橫
扁舟浮島嶼

夾岸集芳蘅勝有山陰興長吟紀勝名

柳鎮春暉

王璟

前溪連古道環堵盡垂楊葉密籠新翠林深染淡黃聞花時掩映
幽鳥乍行藏好借枝頭潤甘霖沛八方

塔寺鐘聲

王璟

招提開慧日靈爽徹諸天徑仄千盤轉鐘鳴萬籟圓飛花聞覺鳥
垂柳靜吟蟬說偈皈依後臨風更灑然

高邱聳翠

王璟

野望殊寥闊迢迢射紫氛阜高晴亦雨山翠溼為雲晚色浮僊界
秋光對夕曛臨風何所憶揮灑賦奇文

德勝奇觀

王璟

荒城猶穴兔鄰渚尚飛鷗歲慨先唐迹蕭條古晉邱林深偏照月

樹老易驚秋，遺相遙瞻對。關干逝水流。

淨坡煙景

王璟

坡遠題清淨，寒汀集野鳧。煙光回岸闊，雲影罩城孤。極目疑霄漢，平橋恍鏡湖。漁舟時出沒，歌唱斗牛墟。

北湖秋色

王璟

為愛幽奇地，頻頻載酒過。涵空秋水靜，映月暮雲多。荇藻飄紅徑，芙蓉翠碧波。西湖好風致，對此更婆娑。

題高儒女

巡按御史朱欽邵武

未親夫面繼夫亡，不比尋常烈女行。白首尚難貞，晚節青年誰肯棄。春光魂歸天上，乾坤老名在人間。草木香吾輩，豈容輕灑淚。賴

伊千載植綱常。

上九首舊志

秋日送閣又新計部之金陵

趙宗昉 邑人

雙旌曉發向長干憂國籌邊事事難論定黨人終見信時清才子
起為官秦淮渡口秋風急燕子磯頭明月圓南國金錢憑會計舳
艫千里大江寒

題王岡二婦遇賊不汗

趙宗昉

王岡節義似雲屯烈烈貞心萬古存姑已捐生全大節婦猶死孝
報親恩寒煙蔓草無形迹淡月梅花有斷魂客子往來休濯足溪
流從此不堪渾

楊烈婦祠

趙宗昉

烈婦當年奠此疆故城遺像竟淒涼庭前慷慨鬚眉語陣上從容
弧矢張能使淫祠猶電擊誰非英爽挾風霜如何依舊渾僧寺野
鳥殘枝話夕陽

上三首燕
居詩集

題頌山

黃從貴

邑人

淮陽官道漫停車佇目山阿帝子家白水真人朝裏露昆陽戰士
浪中沙荒邱寂寂晴雲鎖古廟蕭蕭亂雀譁試問頓南山上月英
雄磨盡亦堪嗟舊志

詠壽歌

國朝黃 載 邑人

余家嚴慈兩大人同誕己酉一於仲春一於仲秋今歲一
週甲子年踰六旬正人子稱觴祝頌之期况我家嚴久抱
沈疴幸賴頤養用集多壽可慶實甚其在素封之家每有
賓客盈門持羊酒來賀者即不然或備物備禮盛筵悅親
以介無疆壽當亦人子快事也余俱有所不能但率我弟
兒姪輩稽首依依膝下庶望吾親加一餐因為此歌以自
見夫何人之禱親者豐而吾之禱親者嗇乎余聞之曰事
親莫大於守身守身莫先於養志余惟兢兢於此而已若

夫多方營謀僥倖厚利以供吾親一朝歡余小子願謝不敏焉

大造生成乃至德春華秋實可紀勒甲子邇來見天心庶彙森森咸載色高厚湛恩本有餘甘霖細灑和風噓貞元久道化奚若浩然一氣更磅礴遲暮祁寒賦無衣桑麻花絮歲早飛原隰稼穡嗟維艱黍稷續紛堪怡顏六經文字亙古傳發蒙啟悟祖先天昏墊既數為膏壤永獲攸居食井養時數平陂關會運楚客何故頻相問美利優渥豈嘗言布濩遠注似雲屯凡茲生成物皆賴昆蟲草木都不外愧予俯仰處其中曾無涓埃答蒼穹鶴鷓啼鳴芳樹稍桃李競秀在東郊終年咕嗶類碌碌寡營少事比佳福綵戲堂前安所祝松柏歲蕤南山麓兩閒生成莫比倫夙夜明發懷二人

題楊烈婦祠

黃載

志烈由來著大唐荒烟蔓草共淒涼殘文久廢無人識遺像猶存
往代妝仗節渾如顏太守捍城不亞張睢陽英風閨閣當年事留
得聲名萬古芳

大梁黃生載公初贊兼山堂出所攜詩文共質善氣虛懷同
坐有賞音也為一詩以贈之

孫奇逢 容城

老學殊慙秉燭光爾來輝我此山堂斗閒氣向杯中落天外霞飛
塵尾揚疑義共參忘夜漏孤懷欲往凜秋霜行生滿目原無隔大
道今知歸是鄉

答黃載公

孫 沄 夏峯
之孫

春雪初晴叔度來閑人門戶不能開解裝暫結座中夢隔屋同傾
月下杯一紙鴻傳君有道十年硯試我無才奚囊果否仍留此設
計偕登師曠臺

過訪黃載公

孫 沄

一灣水抱杏花村為訪窮交喜尚存
茆屋三間堆卷帙由田百畝
長兒孫謀生到老還耕舌
遜世雖貧不改轅我亦齒搖髮欲白
君容那得似梁園

答黃載公

竇克勤 柘城

雅範每從書冊知偶來墨翰喜盈眉
學分高座龜山望道尚庸行
洛水遺負笈此心懷願見梁毫今日
早訂期伊人宛在關河阻大
梁風槩勞相思

贈黃載公二首

萬如洛 淮甯

焦土燎原劫火餘獨來河上卜新居
百年心事樂還苦半世生涯
樵更漁有弟久聞季方似謂輔公
生兒盡羨仲謀如幼子十餘齡能請五經
醉鄉一笑堪投老不怕閒愁不破除

蘇門徵士曾心許

夏峯先生

白奔山人獨眼青

閩古

五嶽難逢龍勿容

百泉久應少徵星乾坤寥落雙蓬鬢身世支離一草亭賴有侯芭

高弟子為君珍重太玄經

上八首黃氏家藏墨蹟

大吉寺

知縣黃陞亳州

何日淨塵緣祇園且叩禪鳥音叶梵韻花氣和香煙果證三摩地
法超五蘊天名心到此冷歸去未知年舊志

送唐銘歸項城并序

吾唐銘流腐一十五載矣始焉羣謂無唐銘洎踰歲覽手
蹟知唐銘託得其處與人今之夏仲忽持面示歸疑從天
降未幾復云還噫誰為子家乎蓋不勝痛於衷也聊以小
詩別之唐銘桐城人明左忠毅公光斗從姪孫數歲時因
祖光先尚在未幾復反其伯叔昆季多為詩歌以送之

亂後終逢識舊遊，離樽又忽勸行舟。
不堪芳草情初歇，止剩垂楊影挂愁。
霜滿園懷幾許，江鱸肥處可能留。
他鄉兒女都成樂，猶是浮屠十五秋。

芙蓉露冷動思情，想與鄉心積夢驚。
溪水倒迎歸舊里，巖雲翻送過愁城。
須藏鳳詔圖南志，無效鶻啼向北鳴。
司馬琵琶都為別，歌來恐是噉猿聲。

乾若叔贈

聞說汴梁路計程，足累朝嗟君今日別。
幽夢亦迢迢，到來家為客歸時客。
仍家千里無憚遠，中土舊京華。

子和伯贈

勿怪古人重別離，來時驚喜去違之。
遼東歸表今能見，冀北空羣後幾時。
年老易親惟子弟，情真便是久追隨。
只茲握手訂重晤，為看耆夫髮已絲。

欽止伯贈

以上數詩按當日原稿鈔錄故稱謂亦皆仍其舊

師氏家藏墨蹟

遊大吉寺

閻 潮 邑人

秋意晴無色禪關晚不封雲深棲野鶴天迴落寒鐘萬事貧能淡
一身老更慵楞嚴清妙理疎豁到孤松

宛在亭

閻 潮

籠煙貯月跨中央為溯伊人水一方不見醉翁亭畔樹至今猶說
是歐陽

輓金烈婦二首

閻 潮

深信從夫道捐軀報所天目能瞑地下嗣可續生前義補乾坤缺
心懸日月邊寒梅青冢上香逐水潺湲
死節尋常事獨為死者存難終堂上養暫繫未亡魂正敝黔婁被
偏高盧邁門從容全大義松栢自無言

以上數詩按當日原稿鈔錄故稱謂亦皆仍其舊

師氏家藏墨蹟

遊大吉寺

閣潮邑人

秋意晴無色禪關晚不封雲深棲野鶴天迴落寒鐘萬事貧能淡
一身老更慵楞嚴清妙理疎豁到孤松

宛在亭

閣潮

籠煙貯月跨中央為溯伊人水一方不見醉翁亭畔樹至今猶說
是歐陽

輓金烈婦二首

閣潮

深信從夫道捐軀報所天目能瞑地下嗣可續生前義補乾坤缺
心懸日月邊寒梅青冢上香逐水潺湲
死節尋常事獨為死者存難終堂上養暫繫未亡魂正啟黔婁被
偏高盧邁門從容全大義松柏自無言

坐竹林乘風

閻 潮

暑酷愛微涼侵晨散髮立蟲響發木陰露宿晴竹溼倩童移我榻
茶鑪並書爰喜無塵囂襍而有清風入客來亦不俗但坐不長揖
回首見南山悠然雲氣集山光接竹光遠近歷原隰鳥性悅深幽
興我漸相習到此冷浮名吾生耽蓑笠

上五首端
操堂詩集

南頓懷古

悠悠大業枕荒邱漢代曾邀帝子遊地自寂兮人自遠山空青也
水空流星臺月冷當年蹟鹿苑草舍今日愁極目蕭條增感慨白
雲紅樹幾經秋

準提閣

知縣 鈕 琇 吳江

為政宜觀水緣隄到梵林清如波底月不獨照禪心

光武城

鈕 琇

南頓啟真人荒城有遺址秋草何芊芊日登牧羊子

高邱寺

鈕琇

上方鳴早鐘清響松閒落遠度石梁風隔林醒棲鶴

婁隄

鈕琇

兩水夾春隄碧光一何永俯橋視浮魚吹動羣虹影

金雞冢

鈕琇

野花開復落綴地明如綺啼斷曉雞聲冢中人不起

燕子溜

鈕琇

居人戒舟航盤渦勢難測始知急流中進退宜早得

鄭湖

鈕琇

負鋤香在衣疑是子真侶湖上飲犢還身沾藕花雨

柳鎮

鈕琇

柳色依村遠茅茨綠滿扉晚鴉無次第俱帶夕陽歸

上九首舊志

行部過項城舊館

開歸陳金山正黃許道

車馬奔馳久巡行去復來圖書仍靜雅花鳥絕塵埃麥熟千家樂

天光四望開從來歌歲稔何處不春回

府志

小春示諸子於文昌宮

知縣張為旦全州

晷短休迷路崖危莫墮砮靜看塵世上半落陷阮中自立須防倒
羣呼漫學聾艱難深度夜旦日待鳴鐘

遊準提閣次唐人韻

張為旦

古剎虹溪繞梵林第一家石渠開朗鏡碑勒帶晴霞雀啄階除粟
魚翻水面花徘徊過別洞吏報夕陽斜

率諸生遊金難家因口占二絕示之

教諭王中閔鄉

諸賢欲問道如何近在人心豈有他試看金難家上月天機動處

莫蹉跎

千葩萬萼樹頭開
朵朵都從一處來
定性工夫無內外
根苗不費是空培

率諸生集文昌宮問學二首

訓導楚 芬宜陽

莫把工夫外面修
天心只在我心頭
若教打透生生路
月白風清水自流

人心天理本流行
潑潑源頭一路生
此是中和真面目
休將快活任虛情

謁傅公祠

張延福 邑人

憶昔狼烽謬報忙
抱疴支敵出倉皇
齒寒誰解孤城守
舌在公還罵賊亡
百代褒忠垂國史
千年禋祀懋虹陽
西風吹起英雄志
斷碣悽悽淚兩行

虹陽書院落成

張延福

魚躍鳶飛喜落成，鵝湖鹿洞共崢嶸。
世無孔孟乾坤息，學到周程日月明。
議論高虛終害道，聖賢平實豈爭名。
光風霽月原無迹，分付庭前草自生。

苦婦吟

按節婦姓閻氏張奇構妻詳列女志

張延爵 邑人

妾本名家女，煢煢幼孤獨。
相依惟慈親，艱辛可罄竹。
及長賦桃夭，滿擬光我族。
母氏送之門，慙慙相告囑。
敬戒更無違，自求應多福。
于歸已頻年，時屯生計促。
何來二月絲，何來五月穀。
眼前瘡猶在，心頭已無肉。
思量無長策，午夜勤杼軸。
杼軸今已空，無計空碌碌。
朝出採藜藿，終日不盈掬。
山花自飛紅，隄柳空垂綠。
悄悄我心憂，不知春光足。
歸來復提甕，出汲還挽鹿。
姑命辦晚廚，無米不成粥。
鄰母負未償，春衣典莫贖。
三年不歸甯，心向白雲逐。
白雲去悠悠。

使我空極目豈無姻婭來相見羞無服昔也羨朱顏今也槁如木
昔也理雲鬟今也絕膏沐莫向高堂言聞之應頻蹙翁嫵非不慈
妯如非不睦但嗟妾命薄云誰莫我殺默默此哀自吞吐夜績薜
蘿淚如雨

南頓懷古

張奇猷 邑人

淮陽故國已成邱緩步崇臺四望收遙指荒城皆穴兔近臨沙渚
半飛鷗中興舊跡依然在列宿遺蹤不可求俯仰頻深身世感那
堪更上一層樓

上十首
舊志

哭邑侯梁絅菴

王 轍 邑人

四載勤勞不顧身官清貌瘦卻肥民玉樓天上何須記忍奪南宮
一蓋臣

夜思考妣不寐

王 轍

枕畔空餘血淚斑，思親容易見親難。
孤雲萬里有來去，二老重泉無往還。
膝下瞻依渾是夢，堂前菽水愧承顏。
他年縱有焚黃祭鼎，食何由視飽餐。

李母劉孺人節孝

王 轍

丹心絕不計名留，淑德沈冥應闡幽。
訓子能封陶母，鮒格親省識共姜舟。
絲綸寵錫仰宸翰，金石貞銘冠豫州。
一世風霜

堅節義馨香，俎豆報千秋。

上三首浮生老人詩集

火燒店帛故明太子少保總督三邊忠壯傅公宗龍

知府 崔應階

有明之末國運否，中原鼎沸妖氛起。
女妨夜織，男妨耕，旱蝗兵變無窮已。
老填溝壑，壯者逃四海，無人憐赤子。
是時文官竊恐多愛錢，武官未必不惜死。
養成流寇不知除，縱令弄兵潢池裏。
殺虜無

厭四野虛難犬絕聲城郭圯伊誰遺爾君父憂一二孤臣那堪理

傅公總制東出關受命專辦賊聞李軍聲赫赫自西來誓須朝食

先滅此是役從事者為誰人龍國奇文岳耳師次新蔡與保督楊文岳兵會賀人龍李

國奇將秦兵虎大成將保兵結橋欲趨水上軍五日畢渡來項城黠聞規知雨

軍至渡水佯驅老弱兵人龍暨子失奇算遂貪香餌行兼程我馬

既疲人力乏逸勞不敵止為營壁壘未成伏輒起四面惟聞風鶴

聲一擊不勝兩軍潰諸將惟法皆逃生人龍等俱奔沈邱傅公收兵火燒

店賊尾其後來戰爭圍以三匝殊死鬪環而攻之勢縱橫我軍奮

勇鳴大礮賊眾一震魂皆驚保兵宵潰文岳遁文岳馳奔項城公當賊壘

難孤撐矢窮糧絕無生色日猶殺賊充兵食瘡痍檢剩六千人振

臂一呼皆勇力殺馬烹牛盡犒軍破釜沈舟在此刻夜半勒兵趣

敵營飲刃迎鋒呼殺賊聲撼山嶽陣雲昏氣衝霄漢月為黑積屍

流血滿荒原衆寡既殊臣力竭突圍欲去保孤城豺狼塞路難應
越賊子得志獲將軍罵賊聲雄怒衝髮忽報前軍落大星忠魂竟
與星同沒至今功烈著旗常浩氣千秋凌日月

南頓謁光武廟

崔應階

天未厭火德四七仍為王山川靈秀鍾原野嘉禾吐漢室當中興
爰以誕光武我笑王莽何呆愚棄孤竊國殘賊夫乃敢竊效周公
作大誥動欲法古稱唐虞誰獻銅匱送狐媚吾將誰欺欺天乎四
海人心不忘漢民所怨者天所驅新市平林豪傑起一朝訛傳黃
龍死白水真人契赤符蕭王知是真天子更始既敗赤眉降子陽
并蛙何足齒威加海內歸故鄉何如高祖還沛里縣堂置酒勞吏
民賜復田租由帝仁父老無厭期十歲帝乃大笑思加頻我昔讀
史不知處今過南頓城郭湮滄桑變易二千載猶存廟貌祀秋春

不見春陵氣葱鬱惟餘松柏參天綠田父時遇祝殿庭方今
聖人調玉燭禾生九穗麥兩歧野有遺秉倉有粟我來展謁厯荒
階入門驚起雙黃鵠

光武城

雷方曉 淮甯

千載雲臺將相賢漢家功業廣無邊祇今綠老城頭草一抹秋林
鎖暮煙

上三首
府志

贈文昌宮翠雲禪師四首

翠雲工書法
尤精篆體

知縣 彭 旭

老僧走髯奴貽我數盆菊黃紫各異態芳風動相觸羅列東窗下
神寒氣清肅緬懷柴桑翁穆然見高躅古人與今人豈必殊心曲
曷為五斗米折腰因拘束國家政多故能事紛相促高蹈志不遂
庸遽甘碌碌撫茲愜幽襟吏隱勝林麓

拙宦寡歡悰嘉節為病累我有數種菊風雨入顛顛莖花爛熳開

稍稍強人意妖燒作凡豔相賞不相契君今作白衣欲遣陶令歸
衙齋與禪房喧靜各異地此花得所主懸官非俗吏開觸命歌吟
尋樂集昆季君應為花賀同來展歡戲

王戎巧鑽核下士猶笑之君今破慳顏嘉植煩屢貽盆松挺秀特
帶草縈書帷石榴老結子橘柚垂纍纍此花有晚節霜雪不可欺
天然屏雕琢獨與幽人期秋圃近慘澹得此頗自怡小女不忍摘
並為飾藩籬公餘便攜賞聊復爾爾為

傳舍閱今古嗟我已作客千秋甘棠陰敢謂同召伯顧彼松與菊
依依含悽惻雨載香火緣庸遽甘默默我無坡公帶留鎮山門側
子非參寥師頗亦無咎慝春風綻姚黃桑落醉琥珀我輩傳公墓
疑蹤賴剖白宋張兩廣文稱許互嘖嘖夏子有直聲殷勤計田宅
觀人眎所與况復厚余德作詩報投桃子鞭不易得書成一大笑

草木或增色

上四首文昌宮僧藏墨蹟

題趙苑氏節孝

楊三珠

大義著綱常貞心百鍊鋼風寒彰勁草松健試嚴霜膳向蘭陔潔
書成荻字香禮詩仍鯉訓井臼擬鴻莊竹秀千竿迥相陰萬里長
咸朝崇懿行金石播芬芳

趙苑氏節孝歌二十韻

李軒

上峙嵩高下河洛天地正氣此磅礴鍾靈毓秀於斯人半在男兒
半閨閣淮陽趙族多碩望苑氏節孝尤超連憶昔如賓相敬時融
融一室敦和樂何言中道忽別離君子竟違偕老約哀鳴空留柱
下鸞悲號不見雲邊鶴慷慨赴死亦何難此生義事須斟酌痛言
同室黃泉遊又見高堂白髮落趙氏已無程嬰臣趙家孤兒向誰
託死守兩端權重輕千秋大義精裁度仰事俯育代夫壻不效匹

婦經溝壑自嚴身律樹壺範禮法直追鍾與郝虔修中饋供晨昏
常申義訓戒戲謔節貞心苦倩誰知數十年來甘淡泊谷有蘭兮
澗有松品節奇異芳名博聞室能將潛德修幽光肯教終寂寞史
臣秉筆存直道
綸言煌煌書鳳諾節操直宜壽貞珉常令世
人生恭恪我本無學且乏才聞茲賢行愧疎薄不堪增輝堪揚善
矢音聊將短歌作

題趙苑氏節孝

徐資乾 光州

上殷將母下教兒鍾郝家聲宛繼之蘭佩早傳蘋藻節桐山待發
鳳凰枝苦憑隻手承傾厦力繫千鈞仗寡絲巾幗能肩名教重並
看畫錦煥慈帷 上三首苑氏家藏節孝錄

小頂寺

張安雅 邑人

偶來尋野寺不為訪禪宗黃葉渡頭樹夕陽煙外鐘棲鴉噪古殿

蒼鼠竄深松歸路蟲聲滿村蹊草露濃

御製耕織圖歌

張安雅

仁皇御製耕織圖圖中描寫工絕殊太平景象豐年樂七月幽風
同臨摹憶昔 文明初丕變澄清氣象如平旦圖書 欽定

佩文齋 經筵日御文華殿郁郁 文德遍八埏 國本還

思重桑田 衮衣深念蠶絲苦 玉食敢忘稼穡艱 翠華南

巡幸江浦親向田家問疾苦 停鑿細聽插秧歌 傳譯不

避懿筐女豐津園畔開陌阡 苑柳宮花桑柘煙戴勝啼晴鳩喚

雨轆轤聲斷縲車牽 籍田獻繭奉 郊廟法官身教萬民

先早朝晏罷閒遊豫應與靈臺魚鹿同流連流連遊豫傳盛事更寫

丹青題詩字秉貞畫筆世稱絕 睿藻流葩親更切蠶婦瑣事

老農情一一描摹細體貼 貽謀思教萬世垂 雅化豈僅

一時說此圖流傳今尚在圖中事事今全改自從大盜起廣西湖
北江南變滄海江湖固是龍蛇窟河南又被流賊躡賊過不聞雞
犬聲千村萬落黃蒿平駝駝戰馬機中女滾滾弱體隴上氓連年
况復遭蝗旱羽檄百道日徵兵 聖主憂勞意慘惻那更聞情
問耕織縱使丹青重作圖萬幅流民皆菜色回首 宸遊省耕
處浮屍滿江流戰血撫圖感事心悲酸太平風物尚目前願為
堯時擊壤叟恨我遲生二百年

聞僧邨已平賊壘喜成十六韻

張安雅

皖豫妖星滿乾坤殺氣高 宮中日怛惻河上自翔翺伯舅加茅
土藩王建節旄誓師紛雨泣下令肅秋毫天駟皆龍種彤弓盡虎
韜威靈天上下啾唧草間號始信犬羊衆原非蛇豕蒙蔓滋憑作
養淵藪萃逋逃颯雜摧枯梗紛披斬亂蒿數州撤穴窟一炬蕩腥

藤迫脅憐餘種殲誅盡老饕連雲築京觀春雨壑荒濠筐食數盈
野淮泥血洗刀論功憑信史奏捷恥言勞威德歸 丹陛觀豐塊
備曹先登乘勁旅指日下江皋

賢侯引送恆啟庭明府轉任宜陽

張安雅

江南烽火燭千里馬如飛蝗賊如蠛項城近接流賊衝處處狐鳴
相應起去年節賊來上公鐵騎千羣嘶邊風雲梯礮車委道路議
勦議撫兩無功一撲不滅勢轉怒焚村掠野恣跋扈紅粉淚垂銅
馬鞍白骨灰揚即墨墓災黎運轉天眼開桓桓賢侯下車來拔諸
水火登衽席我侯之來何晚哉侯曰吾民胥吾子一體原同指臂
使急之民窮則為盜緩之盜安仍民耳縱教殲誅無子遺東滅西
豈不勝耳與其多殺干天和爭似格心使知恥幅巾曳杖入賊屯
諭以禍福結以恩一時酋長來羅拜感泣跪首兩紛紛擁兵不散

權救死釜魚那復計朝昏妻孥性命皆侯賜頭始吾頭身吾身飽
食穩卧遜城市今生重許作良民六十四寨齊解兵老者饑食壯
者耕枳棘重開桑麻野春深處處叱牛聲四海祇今尚鼎沸一方
安堵如長城僕也執鞭忝陪從憑軾親臨烏合衆掉舌雖非廊食
其挾策願隨漢劇孟微名幸附日月光分飛何意忽參商無端奪
我賢侯去一路春風向宜陽宜陽舊是甘棠地今日真見甘棠蔽
與奪偏厚彼方人未免相思成妬忌迴想賢侯未來時傷心慘目
忍重憶至今笳鼓變農歌野店山橋仍犬吠若教考績待三年勝
殘去殺成平治牛刀割雞古所衷龐統原非百里才何緣得化身
千億廓清四海無蒿萊遮道難留恨若何邑黔一曲至今歌千載
賣刀思北海萬家畫像祀東坡虹水迢迢接伊水賢侯去矣船如

駛願學道州賊退篇卻恨才非杜子美

上四首得
所軒詩集

丙子輓烈婦東氏

夏瑞麟 邑人

氏居南鄰夫張嗜賭被人以博局戕死氏視殮後遂自縊
虹水冰結千仞堅萬仗奇石挺頓山採風使者停軒問知是烈婦
出河間維婦前代大夫家吏部讀詩補白華幼習女儀知孝養于
歸真如周南誇朝朝為唱姑恩曲不見郎衣有蘆花姊誓柏舟歡
同氣廚間那聞戛羹譁千秋有恨問於穆淑人難必遇人淑必敬
必戒相夫子夫子終風妾集蓼一日金管闕書名姓氏徽列巾幗
中天意欲成氏節偉故遺氏夫罹凶終漫道彩鳳隊逐烏自凰視
之鳳無殊從一而終甘萬死天性直同甯武愚自失嬌女賦歸甯
屣必雙止繡早成先是郎未亡一夕夢魂早有鬼神驚烏啼不殯
喚白項心如井水妾分明為聞凶耗香車返哭聲儼崩杞梁城痛
念藁砧甘蕩遊不安家室夏徂秋於今離鸞飛泉路着體可有完

袴不質弱心剛誓視殮爭恨殘陽不瞬留昏昏長夜破鏡天繡闥
霜催有斷絃為祝夫靈通夢寐聊憑妾手送冥錢此生奈難歌黃
鵠其血無多泣杜鵑生則同室死同穴好侍履綦到重泉淚灑湘
竹效妃靈黃竹箱負介雉經撒手凌空從此逝罡風吹送滿城馨
吾儕莫漫矜雕蟲鄰有烈婦氣貫虹吹簫尚有同聲哭死乃大節
動蒼穹為糾賄賻葬香骨匹夫慕義渾富窮彤管信足式閭閻棹
楔可建祠可添謀請旌表誰忙煞南鄰高誼有子謙欲徵贈言愧
鮪生我難傳誦到仙瀛聊歌一曲揚芳懿管弱有負松筠貞

詠烈婦王田氏

王詵桂

邑人

壯哉烈婦志傷哉烈婦情情傷歌黃鵠志決捐此生鸞刀藏懷袖
情激義分明亦知營窀穸難俟覓佳城亦知奉尊嫜從此輟湯羹
夫子鑒予心冰雪剖相呈背後游刃出血花光瑩瑩臨難說義時

一念判徑庭多少豪傑士愧此婦德馨婦烈人所仰婦墓人所經
墓前何所樹森森樹女貞女貞棲雙鳥哀鳴漉血誠輜軒采風者
試聽斷腸聲

丹君詩歎

傅孝子吟

陳蘭運 湖北

癸卯之仲冬道經項子園其中有高賢家風紹傳說肖夢無高堂
長此守巖穴倚廬居親喪餼粥面深墨紫頭惟古書手披口不輟
其形枯如桑其髮蓬如雪其心冷如冰其志堅如鐵往來無古今
晝夜無日月寢卧墓前茅飢餐墓前柏木孝以立身立身而有節
任他車馬喧身與世長絕我同潘子來鞠躬虔晉謁先生感其誠
甫一與之接其言真如蘭執手何須熟言之慘我心寒風同凜冽
我亦有雙親終年長相隔難承膝下歡相對無顏色慚見墓旁人
別觀如未別瞻依不忍離時近親魂魄是以心留連神與孝子結

傅氏家
藏稿

傅孝子歌

葉增育 正陽

松栢樹斜陽路一閒黃茅依古墓
路人指點孝子廬為我一一陳
其故孝子葬親日北風吹白雪
川原幕縞素滴淚皆成血
父在母在兒有依
父亡母亡兒何歸
初則席地後纏廬
麻衣不脫三年餘
日飲水一瓢日食粥一盂
枕惟一塊甑室有數卷書
哭罷輒讀讀輒哭
遂使行人不忍過
其廬飛鳥不忍集
其屋年年秋風落楊葉
一燈熒熒出林樾
鬼馬蹶踏來有聲
鬼車飄忽去無迹
孝子眠未眠
魂夢應相接
家中火歸不可火
且急惟涕泣
木落花發歲月改
不出茅廬已四載
我輩言之不能詳
但過其廬人必在我感
路人言遂造孝子廬
蒼顏白髮一老儒
問君年幾何
六十復有餘
我為孝子歌
以待載筆史
孝子項城人
精一姓傅氏

萬民詩歌

長至後一日和曹君欽軒作

鄧伯磊 邑人

搗謙遜謝一緘開雲水清光入座來鶴樹寒生將放蕊鴨爐香蕪未殘灰為文業帶三生慧涉世胸無半點埃指日曲江衣待染何妨春到奮雷催

一杉山房詩餘

月夜訪曹欽軒先生

歐陽繡之 邑人

故人高卧水雲鄉城市山林雨不妨大地月明空萬籟書聲遙在水中央

贈杜師竹明府三十韻

歐陽繡之

國家急良吏將以風厲之如何十年來吏道各分馳哀哉此下民鞭扑分安辭魯山與陽城斯人杳難追項南思兵燹連年幾喪師四郊方多壘耕犁廢東菑死者填溝壑生者餘子遺嗷嗷中澤鴻音響亦何悲昔者數守令未聞沛恩施依然感誅求征徭力不支

公當恣宴樂生饗民之脂餘橐飽胥役追呼盡瘡痍一二老寡妻
猶足備晨炊我讀石壕吏淒慘亦如斯頃聞杜母來得遂借寇私
下車首河渠因地以制宜灑沈復澹災水惠悉平夷如歌漢宣防
萬福造無涯政餘先潔己義利窮毫釐朗如虛堂鏡屢照目不疲
清如玉壺冰在涅固不緇攝官纔幾日輿頌遍羣黎節屋鮮雀鼠
風俗為之移我時至其室清談沁心脾訟庭花叢叢公府草離離
放衙無箇事鳴琴與賦詩緬懷循良傳依樣慄風規公才非百里
惜此限鴻儀漠漠虹陽水鬱鬱鷓鴣城陸聊以備風謠陳詩當口碑

上二首歐陽
氏家藏稿

丙戌重九集夏氏子沛退思園作七古一章 張瑞楨邑人

丙戌之歲節重九退思園裏宴諸友名流勝地兩相歡醉翁之意
不在酒酒天花地舒長嘯烏帽凌風掀然笑登高壯觀意茫茫桑

田滄海寄憑弔主人袖出古錦囊號令仿佛聚星堂刻燭擊鉢相
唱和鴛鴦賦就始傾觴蓮溪夫子扶溝柳君品望峻經師人師啟

後進須臾幻出江管花獨步騷壇結筆陣主人格律亦能精九天

咳唾隨風生攜來謝眺驚人句擲地當作金石聲長沙兄弟鄧薇筠文

垣伯不可當李杜遺音嗣盛唐繪出清秋好風景文章萬丈吐光

芒更有渤海賢昆仲高冢葬心絕代才華獨軼衆不負詩中一世

豪手持蠅螫口吐鳳鳳威東鳳威早稱老名宿秀骨珊珊逸松菊

元城不墜舊家聲晚節消受平康福才名藉甚推瑞宇馬瑞卓然

不與流俗伍新詞旖旎似香山應教價重雞林賈卯金劉海樓經筵

何便便文思輕捷下水船阿戎仲嗣鳳毛尤擅譽風流名字寫紅

箋吾家彤輝富詞翰錦繡琳瑯光璀璨檻外簪毫聊苦吟數莖新

髭為拈斷惟余愧無腹中藁石上題詩苔空掃捧讀諸君絕妙辭

縱有元白亦壓倒今日華堂對綺筵新霜滿地菊花天光陰迅速
留難駐容易秋風又一年吁嗟乎右丞輞川今已古石家金谷餘
殘塢當日園中舊芳菲野徑無人隨意舞後之視今亦猶昔風月
有情誰為主時光過眼難悲歡我輩忍同草木腐君不見廣陵高
會賞芍藥羣公次第願臺閣主人有酒且同酌莫謂古人不可作
張氏家藏稿

別諸生勉學

時王講蓮
溪書院

曹學禮 邑人

臨歧握手話諄諄立品期無愧此身分內要圖惟德業生人大節
重君親一心主宰常居敬百行根源好認真有盡者言無盡意婆
心總為此良因

琴軒
詩集

仲秋蓮溪同諸君子賞月小飲

柳堂扶藹

蓮溪非無蓮有蓮無人守兒童事採摘漁舟來往走旦旦而伐之

遂已歸無有周子愛獨鍾保全三月久田田葉漸生萬柄齊翹首
六月花未開花開遲秋九今值仲秋節玩賞偕諸友看花月滿身
弄月花在手輕圓花上露清脫花下藕月下度香風同醉一杯酒
酒醉問諸君蓮花可愛否愛蓮無傷蓮端宜善厥後勿使蓮溪蓮
抱憾柳州柳

蓮溪晴望

柳堂

微雨初晴望眼空蓮溪門外立春風半灣芳草紫深碧夾岸小桃
放淺紅水面浮沈雙鴨子船頭漂泊一漁翁天然詩趣天然畫欲
學維摩愧未工

游大吉寺

柳堂

唐人題詠後

溫庭筠有
大吉寺詩

勝地重花封大將晨鳴鼓

時豫營
鄒住此

殘僧夜

打鐘樹高風易起技巧性難慵何若客迂拙巢雲伴鶴松

傅公祠

馬秀芝邑人

秣陵祠宇耀堂堂旌旆常留日月光力保孤城拚一死特存正氣
振三綱墳臨虹岸山猶色地接奎樓水亦香讀罷豐碑頻墮淚蒼
松翠柏冷斜陽

頌邑侯杜公德政并申祝嘏

馬秀芝

秣陵城南稱澤國歷年消患消不得嗟維揚水如建瓴又引洪河
灌入黑雨水橫溢數百里械鬪命案釀頃刻奔訴各憲百餘年石
壩傅路費筆墨屢修屢毀訟如前籌思再三無良策中丞涂公居
下游設法調停將訟息培修石壩並疏河巨款頻發垂典則那料
意美法不良高下情形上未識項邑地勢本窪下疏河無濟費民
力何如珍重慎隄防力堪捍禦範南北幸有杜母福星臨親詣兩
岸動愷惻相度地勢罷疏河力主培隄保稼穡公牘三上始挽回

欣欣相告有喜色
倏將滄海變桑田
受福無量恩罔極
今日我公際生辰
口碑載道頌明德
萬福同來祝公堂
彷彿當年宣防塞
僕亦不才忝執鞭
日隨奔走在河側
稱觴愧無生花筆
聊呈俚語當碑勒

上五首馬氏家藏稿

郡門夢母表哀六十韻

余連萼 邑人

我母生我時行年近四旬
凡姊迭夭殤哀暮幾銷神
所以視晚子倍逾掌中珍
兒生苦孱弱母病亦侵尋
祿抱並提攜閱鬻殫恩勤
家貧少僕婢鉅細必躬親
縫綴兼洗滌誰哉代勞辛
况我父與伯聞望孚里鄰
談經及問字往來多親賓
無米苦為炊拮据對薦薪
雖寬內顧憂艱苦難擬倫
中復更患難憲網註儒巾
有子弱不支何以雪覆盆
無已遣侍側用慰嗟懷人
母時病尪弱血淚灑孤衾
可憐九歲兒不能兩地分
難平賦言旋庶幾鬱懷伸
孰意未五年

父脩赴修文哀哉吾母子賦予何遭迤母視兒為命兒依母為生
始信李令伯陳情原有因稍長隨叔讀夙夜母懷屢教兒敦實行
孝弟可立身教兒學端莊方正人所欽教兒習勤謹情慢世所賤
教兒勿刻薄忠厚務居心教兒勿廢學詩書世澤新自從識之無
無日無規箴每從外傳歸少淹必催敦豈不傷遠離良恐荒舊聞
吟壇結儕侶鎖院逐風塵臨歧屢提撕敬業兼樂羣刻骨戒紛華
珍重惜光陰追維慈母訓一一當書紳碌碌逐名場轉眼三十春
翻然知變計假館供饗殮不謂數年來家運復坎屯才鈍追風燭
何以答深恩仰賴先澤多丙子脫青衿久慕徐仲車奉母遊都門
版輿常追隨食鼎坐累茵非敢羨祿養庶幾娛晨昏孰知數月間
沈疴苦相侵醫禱訖無靈竟為永訣長鸞帷不可攀長此隔窳窳
叩地地無戶呼天天無音天地本至公哀我獨鮮民迴想母在時

一刻值千金戈難揮魯陽香觀覓返魂攀柏與負土自恨徒紛紜
還記彌留際誨兒猶諄諄男兒志顯揚前途奮青雲兒今來都下
迢迢隔關津十月五夢母倦念竭殷勤危高慄山巔湍急怖水濇
兒不能侍從慎勿遠來頻所恨恍惚間哀曲難悉陳南望白雲過
遙遙履瓏墳漫言海天寬此恨何有垠摧腸一浩歌滂沱滿衣襟

孚山詩集

歲饑有感

高贊善 邑人

十九流亡苦薦饑寥寥存者復瘡痍草空大野牛羊瘠樹盡連村
鳥爵悲喜說蕩恩寬課稅端如久病仰參芪屐倉濟得人多少但
祝來年早見貽

高氏家藏稿

勸弟仲唐勤學

楊浚霄 邑人

性命蘊至道六經細探討四書是階梯一字休草草先聖秘鑰中

自得在深造內聖即外王經綸裕懷抱程子不云乎不學便衰老
功名全放下貨利一帚掃集義道日充善養氣浩浩雙親兄事奉
常思供羊棗養志是第一仁親以為寶家事一身當但愧才識小
弟功密也未自證復自考時序莫虛擲眠遲起宜早兄言亦不再
趁此春光好

怡怡
詩草

寄懷余子赤

黃舒曷

湘潭

暮冬雲樹渺天涯樽酒何緣慰所思一片落霞紅不斷平臺正是
望君時

小齋花訊報春回道遠何從寄驛梅為問先生無恙否臨風幾度

盼鴻來

上二首晚
悔菴詩集

附闈閣詩

送王弟松崖之任滇南

高梅閣

邑諸生張
安雅母

君始出書帷萬里治蠻地宦囊金錯窄世情風土異道路阻且長
慎儉宜深誌大凡遇險峻夜勿解裳寐歲饑多盜賊僮僕皆况瘁
勝境逐面逢亦莫恣遊戲南行風最侈日用當籌計第宅取足棲
切勿營華致衣冠求無嗤莫與人競麗飲食但一飽亦無思佳味
事上要欽誠守禮莫慕勢有喜勿相趨有怒宜相避升沈掌握間
無自沾罪戾勤勞得其心須防僚友忌言莫矜己功行莫侵人利
怡然致謙恭久則生和氣到署聘益友用役擇良隸如逢巧佞徒
當先察狐媚詞訟必親閱曲直要理細得情矜勿喜小民懷敬畏
視民如視子崇農更崇士人人務耕讀一方當自治報君復顯親
方見丈夫志匪我言叨叨稍貴驕奢易惟茲慎與儉願君常自勵
重陽前歸甯將返弟姪輩設筵寢堂恭紀長句為壽並示羣

季以借別

高梅閣

促織催人歸去忙，明年方可話萱堂。雖離咫尺終分袂，豈必天涯始異鄉。棗萼蘭枝同列座，綠橙黃橘已凝香。可憐膝下無多會，手折羅英獻壽觴。

責子二首

高梅閣

弱冠年華正富強，甘心頽惰度時光。不將事業尋周孔，卻把襟懷學老莊。魯到曾參終作聖，才如阮籍止成狂。縱教富貴浮雲視，也合立身務顯揚。任使生成是俊才，也須人力自栽培。功夫不向身邊做，學問難從天上來。作賦更殘筆始下，讀書睡足卷方開。洪鈞賦爾應心悔，枉把聰明畀散材。

子安雅從學於外，寄至思親詩。余懼其懷歸廢學也，作詩箴之。

高梅閣

冀鄉風雨念庭幃我獨何心與汝違為冀學成甘遣去雖勞夢想
怕懷歸養心不在曾元酒承志當思孟母機况祇春風三月坐漫
因百里歎蓬飛

不必深憂我二人二人都是健康身平安無事即為福饘粥有餘
未算貧何用家庭供犬馬願將姓字表麒麟吾兒果體雙親意作
賦讀書好認真

歲五弟眉崖

高梅閣

半生名士耽樵菽世業崇朝蕩欲無棄學不來問字客廢詩亡去
負囊奴食更魚肉成蔬水衣乏緼袍况路孤凍餒不堪療賭熱霜
朝雪夕枉愁吾

七開糠芋五彫傷剩我兩人在一堂死有榮名悲尚淺生無恆產
根偏長破牢勿俟亡羊補朽索終非馭馬方莫更喜心生見獵書

林重入有餘慶

咸豐四年六月作

高梅閣

行年七十餘精神尚頗有方幸身壽康轉歎時不偶長髮據江淮
奸民聚林藪弋者無良弓獵者乏走狗烏兔肆猖狂鷓鴣甘縮首
赫赫措紳家白晝遭劫擄窮村勢孤弱焉能常保守巨鼎烹肥雞
深盃酌黍酒寄言子婦輩多多揮數斗無留自甘旨充彼豺狼口
况復到明日欲飲知能否

亂世肆殺傷生民未見稀生民之所急莫甚食與衣如何田家子
不將稼穡依如何閨中婦終朝輟杼機均言死無日何苦勞膚肌
十千沽美酒劇飲未為非我一聞此言不禁發長喙此後果無生
所見誠灼輝他日如不死何以禦寒飢將欲入西山曾有多少蕪
欲不受嗟來冒冒將焉歸只有此二道君請決從違

死生皆有命君子居以俟雖值多事秋我心有定止憑彼蠶與蜂
任他虎與兕如其轟然來不過拚一死流毒既未及還須謀終寧
啜我青藜羹餐我黃梁米補綴既有媿論文又有子小兼三四人
筆硯皆能洗有時作書畫足可供驅使干戈無復憂但愁無佳紙

箴子

高梅閣

聖人實踐在中庸論地談天總是空心性源頭容易悟家常瑣事
最難窮希天事業非高遠下學工夫要始終探索精微厭粗淺古
今誤殺幾英雄

述懷

高梅閣

古往今來億萬年生民心性總同然人皆可以為堯舜我獨不能
學聖賢少壯恨無勤砥礪老衰安敢更速遭姑拚搔弄竭暮力莫
管及泉不及泉

墓門木拱行相待人世紛華久澹如獨念死生沈醉夢敢因老耄
廢詩書前言默識求心得私意密刪當寇除盡此餘年無息止雖
然非智也非愚

示兒

高梅閣

儒家道出有生後非自無生致討探賢聖功歸形實踐仙禪病坐
理虛談九思三省當先務二氣六爻再並參弗顧庸行專易象端
如明月印空潭

上十五首
形短集

同治壬戌仲冬余避亂大成寨良人避亂天成寨忽聞寨為
賊破人心惶惶登陴遙望有感

葉靜可

邑諸生王
立綱室

北風颯颯徹心寒東望雲深淚不乾烽火旌旗處處是良人傳語
幸平安

天邊雁影各分飛

時昇初三弟
營總理文案駐

欽派宋
札汝甯月自團團雲自依悵望

風前應灑淚夢魂無日不思歸

送外北上

葉靜可

打疊輕裝一月遲今朝真是送程時
山河燕趙憑誰賞寒煖風霜
要自持課子功疏君莫念持家勤
慎我宜知京師吾弟如相問漫
道艱難增弟思

贈楊氏姪婦

葉葛氏妻

葉靜可

十年離亂後相見何遲遲
今夕重聚首各道長相思
歡言酌春酒陶然共忘機
呼婢具餐飯煮菜復烹葵
饋我長生藥贈我當暑衣
感君相愛意一飯報豈違
參商不可度魚雁難憑依
明朝揮手去會面在何期

竹枝詞

十二歲作

葉靜可

四月清和雨乍晴夕陽斜照碧波清
最憐十二垂髫女也向湖頭

學採菱

荒年

葉靜可

孰云藜藿可療飢始信凶年即此時
兒女膝前啼凍餒挑燈猶訓誦
誦毛詩

病中作

光緒己卯冬

葉靜可

伏枕無眠霜氣清呻吟轉側夜三更
遙憐華髮分南北近見兒曹
喜縱橫有用年華翻棄擲無才家計愧經營
而今卧病何所持試
把鴻毛看死生

讀采薇章有感

在高水趙茂材家教女徒

葉靜可

春來楊柳綠依依雨雪霏霏猶未歸
豈是昔人征戍苦半緣養靜
半緣飢

中秋月下懷

葉靜可

皎皎月明只自看西風裊裊客衣單遙憐今夕團圓節應念離人

寒未寒

上九首靜
可詩集

法古吟有序

丁丑舍

邑諸生
華封女

同治己巳舍年十七五月念五日為先父忌日隨家慈詣
墓致祭痛念孤伶不勝惋悽自維身無兄弟慈親無人事
奉因矢志效法古貞誓不適人每欲述懷不覺淚下屢為
擱筆戊寅秋舍乃齋沐危坐一室謾賦俚語述母女之孤
苦陳已往之艱辛以志哀感

余生不幸幼而運乖年僅九齡眷屬罹災咸豐辛酉十有一年父
於仲夏館舍棄捐次年壬戌八月中秋祖母傅氏鸞駕西遊幼弟
亦亡大姊又折西風哀雁情慘死別慈母一人選親相商備辦裝
殮持服居喪哀哉我母中心如醉痛斷肝腸灑盡血淚悲哉我母

已亂神魂慟絕復甦日月黃昏傷哉我母多歷險阻困心橫慮猶嘗辛苦嗟哉我母萬分無奈悠悠蒼天何所倚賴時勢變亂命途不齊居城居鄉兩地流離屢遭兵燹困苦無窮家資不給衣食不充劉氏姑祖矜恤照顧贊襄料理一切事務申氏舅祖與母籌量來依舅氏始獲安康舅氏課讀義方教子修身齊家樂循天理余年十二畧有知覺乞拜舅氏願與從學舅曰不可汝乃女流學習鍼黹復何所求舍曰曾誦柏舟矢志不移彼亦女娥往事堪師於是舅氏不憚勤勞撫我誨我思比天高數年之間詩書畧通古訓是式以勵厥躬閒嘗慣讀烈女賢傳孝行可嘉貞節可羨宋女陳三父母家貧紡績奉養誓不適人唐女王和父兄皆亡毀容日哀結廬墓旁上書贖親漢代緹縈孝感文皇並除肉形搯虎救父晉時楊香奮身不顧直前承當捐女操舟以救父危順流奔赴蹈險

莫辭趙氏持刀以報父讐閨中英傑智孝兩優漢有曹娥年方十
四抱父江中孝行迥異隋之木蘭智勇兼到代父從征兩全忠孝
夏侯令女刺鼻持身父欲奪志乃曰非仁溧陽史氏未歸壻門夫
死自誓面刺血痕浣紗之女養母不字青蓮為文流芳百世北宮
英兒返樸歸真至老不嫁以奉雙親此數人者皆以孝感天地節
凜冰霜名標青史芳播馨香爰為欽仰而作歌曰企慕前賢者自
身彼何人也予何人我心匪石不可轉願附驥尾步後塵嘗思百
行首言孝劬勞罔極實難報下無弟兮上無兄滿腔哀怨向誰告
無弟無兄誠可傷願以女身代兒郎青絲白髮能有幾晨昏菽水
奉高堂壽祝萱花樂永年孤女一身勵精嚴完璞不勞他山助天
堯既全歸亦全吁嗟乎取法先哲心耿耿黽勉前途勤修者眼底
浮雲任去來浩然正氣塞清迥

秋晚鄧三姑至

丁玉合

長天雁唳暮雲開
三徑黃花喜客來
燭翦西窗人話久
一簾月影下樓臺

白菊

丁玉合

花開延壽繞華堂
迥別凡流自信芳
人依曲欄風乍起
捲簾斜撲滿懷香

點綴疎籬一色新
西風淡抹勵精神
清操羞與繁華伍
玉骨冰心不染塵

萱花

丁玉合

珠簾掩映一堂花
滿院幽香境不詳
細雨輕煙凝瑞靄
偏宜作伴野人家

名花相對不勝情
斜月疎簾分外清
人倚玉欄風過處
飛香坐我

一身輕

承歡日日對萱顏
花自清幽意自閒
到此移情情更遠
無容放眼看雲山

酒酌花前快進觴
南山遙祝壽無疆
清操自勵風霜古
一點丹心

寄夕陽

上八首
蘊卿詩集